


# LUSAPI BWÀ CIIBI

 Ndyèsè bwà kwikala mu tabernacle! Kabìvwa bindila to bwányi mèmè, pàanyi. Mèmè, pa kumanya ne dilòlò edi divwa butùkù bwà mèèsà à Mukalenge, ntu munange misangu yònsò, mèmè mwikàle mu nyùngulwilu emu, bwà kulwa ku mèèsà à Mukalenge. Bwalu cidi. . . Ndi ngeela meeji ne bìvwa bìkèngela bwà beena Kilistò bònsò kwikalabo bàzùka bwà kwangata mèèsà à Mukalenge, bwalu Yesù wákamba ne: “Wèwè kùyi mudidyè to, kwèna Naanyi luseke lùmwè nànsha.” Ki bwà cinyi, cidi. . . misangu yònsò ànu dyèsè dinène dyà—dyà kubwela mu tabernacle. Dìbà adi, dilòlò edi, Mwanèètù Neville mwambe ne ùvwa mudyumvwe ndambù díyì dimupàte, ne—ne ùvwa ujinga ne nèmvwakù bwà kwakula ne disangisha dyètù. Ngàmwambidì ne ndi mwà kusànka bwà kwenza nàнку. Mvwa muswè bwà kumanyisha kàbidì ne bu. . .

<sup>2</sup> Maaalabà dilòlò kùdi cisangilu cyà bantu balùme, balubuludi, maaalabà dilòlò, ne beena kantu-ku-byanza bàà èkèleeziyà kaaba aka, mu cisangilu cyàbò cyà ciibidilu cyà mu òmwè dilòlò ne wabò. . . bàdi ne dipàngadika dyà kwangata pàmwè ne mwibaki. Ndi ngeela meeji ne nwènù bònsò nudi bùmvwè ne dyètù—dyètù—dyètù dilòmba ndyanyishiibwe, nàнку netwikalè mwà kwibaka èkèleeziyà. Nàнку awu aci ncyanyishiibwe, ne pàngāpa bìdi mwà kutwàdija mu lumingu elu. Èkèleeziyà ùdi utwàdija lumingu elu, ku dyànyì dimanya. Dilòmba dyètù divwa dibèngiibwe, mùnu mu Jeffersonville emu. Kàdi twètù kuya ku Indianapolis, mbulàmàtadi wa ditunga, mmutùpèeshe dyanyisha, pa nàнку netùmwiibake. Nènku bìdi bitwàdija, pàmwāpa, lumingu elu. Netùmanye bwalu ebu paanyimà pàà cisangilu cyà maaalabà dilòlò. Ne pashiishe paanyimà pàà cisangilu maaalabà dilòlò, bòbò kabàyi batwàdije lumingu elu to, cintu kampànda cyoci cyenzèke, mwibaki kàyi mwà kutwàdija lumingu elu to, dìbà adi neàtwàdije lumingu lwàlonda.

<sup>3</sup> Kàdi ndekeelu wa lumingu lùdì lùlonda elu, disambòmbò dilòlò, mu dyàlumingu mu dindà ne mu dyàlumingu dilòlò, byà lumingu lwàlondà, edi disambòmbò dilwalwà edi ne dyàlumingu, bu Mukalenge mwà kwanyisha, ndi muswe kwikala ne masangisha malondangane àsàtù, kàbidì, bu mutùvwà benze kukaadi ndambù wa mbingu. Ne pashiishe paanyimà pàà twètù. . . Aci neciikalè diisambòmbò dilòlò, ne pashiishe mu dyàlumingu mu dindà, ne pashiishe mu dyàlumingu dilòlò. Dyàlondà edi, nediiikalè dyà matùkù dikumi ne àsàtù ne dikumi ne ànaayi dyà ngondo ewu.

<sup>4</sup> Nènku dìbà adi bàmwè bàà ku bānà bèètù bàà balùme ne mèmè netùumuke paanyimà pàà cikondo aci, batàngile ku

Colorado, mu lwendu lwà bulembi, pashiishe kwalukila. Bu tabernacle, piikalaye mujike, bu byôbi mwà kwikala diswa dyà Mukalenge, ndi muswè kwangata, pàmwâpa, lumingu lujimà kumpâlâ kwà mémè kuumuka cyàkàbìdì mu masangisha, pa *Bitampì Mwandamutekète* byà Bwàkabuulwibwà. Pabwipi menemene ne . . . Bu mutùvwà ne *Bikondo Mwandamutekète Byà Èkèleeziyà*, mpindyewu *Bitampì Mwandamutekète* bwà kulonda Cyôci aci.

<sup>5</sup> Nènku pàngäpa mu mbingu mitwè ku yìbìdì anyi yisàtù yidì yilonda eyi, bwalu ndi ngeela meeji ne bilondeshile mùdìbo balongòlòle, ne bantu biikalàbo mwà kutèeka ku cyôci aci, bàdì mwà, tudì mwà kwibaka tabernacle ne kumupeta mu matùkù dikùmi, anyi dikùmi ne àtaanu, cintu cyà mùshindù awu. Dìbà adi netùpete mwaba wà kusòmba apa wà bantu batwè ku misangu yìbìdì batùdì naabù aba, anyi misangu yisàtù, pàmwâpa bapite apu. Nènku ke mùshindù úmvwà mwindile too ne pa dîba adi.

<sup>6</sup> Bwalu, mu diisambòmbò ne mu dyàlumingu dishàale, cìvwa cìkwàcìsha bwôwà, nudi bamanyè's. Bantu bàvwa biimàne kuulu mwaba ewu pa dîbà ibìdì jaajaaja mu mapingaja, bwà kuuja tabernacle, kumpàla mene kwà èkèleeziyà kukàngudiibwayè. Dindà dyàkalondà, pa dîbà itaanù wa dindà jaajaaja, mungàngà mukàji udi musòmbèle ku mutumba kwànyi, úfumina lwà kuulu kwàka, e kwambayè ne: “Kuvwa bantu bapàte patapata banyùngùlùkile tabernacle pa dîbà itaanù jaajaaja wa dindà.” Nànku awu, ne dîbà adi bantu, pàdìbo bàbwelamù, kakwèna mwaba, ne bàdì bàteketa mu mabòko buumuka baya. Nènku—nènku dîbà adi bàdì biimàne kuulu abu, buungwile ne batwàngàne nkundù mu tujila tukesè amu, bàdì bùmvwà tukulakàji tubajuuka, ne bikwàbò byònsò. Kàdì ndi mmòna bakàji biimàne mwaba awu, munkacì mwà kukòpakana, nudi bamanyè's, mùshindù awu, ne cisùlùlù cibapweka pambidi. Ne mulùme kampànda ujuuka pa nkwasà wendè ne umufila, kùdì mukàji kampànda; e kushàalayè kacya wimana kuulu too ne mwàkabangà mikòlo kumusaama, ne mùdì munga muntu umupèesha pèndè mwaba. Nudi bamanyè's, ànu mushindu awu, ne bìdì byènza luse, ne baamaamù biikale ne bânà bakesè bàsaama ne bikwàbò, abi's mbibi.

<sup>7</sup> Pa nànku, tudì munkacì mwà kuteeta bwà kuumusha cyôci aci mpindyewu mu kwibaka tabernacle mutàmbe bunène. Nènku netwikalè ne mwaba mulenga wikalà bânà, misangu mikwàbò . . . ne ditwimakaja, bu mùtù bânà bakesè badila myadi amu's; èè, netwikalè ne mwaba bwàbò bôbò, dîbà adi baamaamù bàdì mwà kubwelamù, biikale ànu bamòna mùdì disangisha dyènzeka, ne biikalè balondela ku cisanji mu cibambalu amu. Ne netwikalè ne bibambalu byà kàlaasà kàà dyàlumingu ne bintu byònsò bilongolola mu mùshindù úvwàbì bikèngela. Nènku cyôci aci, bu Mukalenge mwà kwanyisha, ne cyènzeke, mu lumingu

lùdi lùlwa elu.

<sup>8</sup> Nudi basungule bônso lukàma pa lukàma bwáci, ke mutùdi kacya twashàale bacikwàte, nwamònu's. Èkèleeziyà mmudishikàmìne. Cìdi èkèleeziyà wàmba, ki cyôci. Balubuludi ànyi ni nganyì yónso... Balubuludi bàdi ànu, yónso wa kudìbo, ùdi ànu ne díyi òmwè. Mpaasàtà ùdi ne díyi ànu òmwè. Ng'èkèleeziyà, ki cyôci aci—mungàlààtà wà èkèleeziyà, budìikadidi bwà èkèleeziyà. Èkèleeziyà, mu kaabujimà, ùdi wàkula. Kwàjiki. Ne tudi baswè nàнку, bwalu katwèna ne bèepiskòòpò anyi malondyangayi anyi bakùlù batàngidi anyi ne bikwàbò bàdi mwà kutwàmbila *eci*, *cyàcya*, anyi *cikwàbò* to. Kàdi Nyumà Mwímpe mu èkèleeziyà, ngudi munkaci mwà kwakula. Ndi munange kanungu aku, ne mbilenga byà njààjàmà.

<sup>9</sup> Ki mèmè kukonka ne: “Nuvwa bônso baswè kwindila too ne patwàpetà mfranga yàbúngì bwà kuumusha tabernacle eku bwà kwibaka èkèleeziyà munène anyi?” Aci cívwa mu cisùmbù cyà balubuludi, ne kacívwa mwà kukòshiiibwa kùdi balubuludi to. Ke pashùishe kundombabò mèmè, bu mutàngidi wa ku mutù, bwà kulwa kukonka èkèleeziyà. Ke mèmè kwamba ne: “Mpindyewu nyèwù tudi ne mfranga búngì bukùmbàne bwà kudýundisha bunène bwà èkèleeziyà ne kumushimika yónso bishùilàngàne, ne bintu byónso, kutàmba utúvwà nendè.” Mèmè kwamba ne: “Mpindyewu tudi mwà kwenza aci ànu mpindyewu mene ewu, anyi kulama mfranga yètù too ne patwàpetà búngì bukùmbàne bwà kujikija èkèleeziyà, mupyamùpyà, mwaba mukwàbò.”

<sup>10</sup> Ki twètù kwela tukàndà pa cyôci aci mu èkèleeziyà, ke kusungudiibwabì ànu lupungu lùmwè bwà “kwibaka èkèleeziyà dyàkàmwè ànu mpindyewu, nènku mbwà kwibaka èkèleeziyà mutàmbe bunène ànu mpindyewu.” Ki twètù kushààla ànu ne cyôci aci.

<sup>11</sup> Ki balombodi bàà mùnu mu Jeffersonville emu kutùdyombolabù, bàmba ne katwèna mwà kucyèenza to. Ki twètù kwela cidya kupita apu, e kuya ku Indianapolis ne kuleeja Mbùlámàtadi bwalu abu. Ki pashùishe kutwàndamunabò, ne: “tùngunukààyi,” tudi ne dyanyisha dyà kumwibaka. Pa nàнку cimenga kacýèna ne díyi dyà kwelamù mpindyewu to, bwalu bwashàadi bulàale kùdi Mbùlámàtadi. Pa nàнку díbà adi tudi ne dyanyisha, ne mwibaki ùdi ne—dyanyisha mu cyanza cyèndè patùdi twakulangana apa, nènku ndi ngeela meeji ne bàdi pabwípì ne kukùtula midimu pa díbà kanà dyónso.

<sup>12</sup> Mààlabà ewu dilòòlò, pìikalà mwibaki mwàmbe ne mmuswe kukùtula midimu lumingu lùdi lùlonda, díbà adi nengìmanyikè ànu masangisha bwà...too ne patwàbwelà mu *Bitampì Mwandamutekète*. Kàdi pìikalà mwibaki kàyì mwà kukùtula midimu lumingu lwàlondà elu to, díbà adi dyàlumingu dyàlondà,

diisambòmbò ne dyàlumingu, Nèngiikalè ne disangisha kumpàla kwà kuumuka.

<sup>13</sup> Nènkù díbà adi mvwa ne cyà kuèenza dyàlumingu edi, kàdi kulwa kujandula ne bu mùdi dilòòlò edi ndilòòlò ndyà mèèsà à Mukalenge, pa nànkù ngèdi cisààlà ku bwalu ebu bwà edi dyàlumingu. Bwalu, musùmbà bunène nùnkù, kanwèna mwà kwangata mèèsà à Mukalenge badilekèlèle to, nènkù díbà adi twètù biikalè ne èkèleeziyà mutàmba bunène tudi mwà kuàngata.

<sup>14</sup> Mpindyewu, tudi ne Mfùmù wa ditunga ulwàlwa. Kùdi... kaa, nudi bamanyè ncìndì njinga kwamba, ùvwa mufidiibwe mu díkù dyà Hickerson àbìdi mashààle aa. Ne mwanèètù wa bakàjì udi mwimbi wa pyàno, bu yéyè mwà kulwakù kutùtùminakù cyónà cikesè ku pyàno, cyà ne “Bwelàayi Naabò,” bu wèwè mwà kuswà, anyi kaamusambu kakesè kàà mùshindù awu. Nsongàalùme wa kalolo ewu wa mu díkù dyà Hickerson, uvwa mwindilandila mukùngùlù mule awu, nyèwù wàfikì. Mwànà mukesè mulenga wa dikèma, bwà bushùwà yéyè ùdi cilengà mu bakwà Hickersons. Ne bàdi bònsò bilengà kutùdi, twètù tudi babàngè ne bòbò biine bàdi menemene mwanèètù wa balùme ne mwanèètù wa bakàjì. Tudi ne kusàkidila bwà kwikala ne mwànà ewu mukesè mulediibwe mu díkù dyàbò, cìdi bushùwà menemene cishintùlùle díkù àdi. Nènkù bòbò mwà kuswà, taatù ne maamù ne bàdikù mwà kutwàla mwànà mukesè ewu bwà dilàmbudiibwa. Mpindyewu, Mufundu ùdi wàmba ne: “Bàakalwa ne bânà kùdìYe, bânà bakesè, bwà Wàmòna mwà kubàtentekela byanza ne kubàbènesha.”

<sup>15</sup> Mpindyewu, kùdi bantu pa buloba bàdi biitabuuja mu cìdìbò bàbiikila ne “dibàtiiza dyà bânà batekète.” Kàdi, mbwena kwamba ne, bàdi bàngata bânà bakesè aba kabàyi nànsha bàbàtiiza mene to, bwalu, bàdi ànu babàmyamina màyi pambidi. Mpindyewu, katwèna tusangana aci mwaba nànsha ùmwè mu Bible to, mwaba ùkaadìbò kacya bamyamine ní nganyi ní nganyi màyi, nànsha bakùlumpè, kàdi ne twambe bishi bwà bânà.

<sup>16</sup> Ne pa nànkù dibàtiiza nditonda dyà ne mudimu wà munda wà ngàsà mmumana kwenza. Kàdi bânà bakesè kabèèna ne dimanya dyà mpèkaatù to. Ki bwà cinyi, pàakafwà Yesù ku nkùrusè, Yéyè wàkafwà bwà kuumusha mpèkaatù wa bàà pa buloba. Nènkù pàdi mwànà awu ulwa muntu, ne mulediibwe pa buloba ebu, kènà ne mpèkaatù wèndè wa sungasunga to, ki bwà cinyi kènà ne cyà dinyingaleela to. Kàdi, aci, Mashi à Yesù Kilistò àdi uumusha mpèkaatù awu. Mu bushùwà bwà bwalu, mwànà awu mmulediibwa mu mpèkaatù, mufwimba mu bubì, ùlwa pa buloba wàmba mashimi, ne bòbò bàdi bangènzàmpèkàatù ku cifùkìlu, kàdi Mashi à Yesù Kilistò àdi enza dikezula dyà cyòci aci. Kàdi pàdi mwànà mutòòke ewu ufika mu cikondo cyà bujinguludi, ne mumanyè cìdi cìmpe ne cìdi cìbi, díbà adi ùdi ne cyà kunyingalala bwà bidìye mwenze.

Mpèkaatù wendè mpindyewu ùdi mmpèkaatù ànu wa mùdiye mulediibwe mu mpèkaatù amu, mmpèkaatù wa muntu yònsò, mpèkaatù mpindyewu ùdi mpèkaatù uvwa Adàmà ne Evà benze; ne yèyè awu ùvwa mulekelediibwe kùdi Nzambì, kù Mashì à Yesù Kilistò. Mpindyewu mwànà mutòòke kèna ne mpèkaatù wa kunyingalelayè to too ne pàdiye wenza mpèkaatù, dībà adi ùdi ne cyà kunyingalala. Nwamònu ànyì? Nènku pàdiye unyingalala, dībà adi ke dībà dyà kubàtijiibwayè, nènku dībà adi ùdi ùbàtijiibwa mu kutùkinyijiibwa mu màyi.

<sup>17</sup> Too ne dībà adi, tudi tulonda kuleeja kwà njila kwà mu Bible, kwà ne: “Bàkatwádila Yesù bânà bakesè, bwà Wàmòna mwà kubàtentekela byanza ne kubàbènesha.” Muledi mulenga ewu dilòòlò edi ùdi ùtwala mwànà mukèsè ewu kùdi mpaasàtà ne mèmè, bwà dilambudiibwa. Nànku bàdi bùmvwà ne pàdìbo bàbàtèèka mu byanza byà baleeji bàà mpàla wa Kilistò bàdi bàbàtèèka mu byanza byà Kilistò. Dībà adi, ku diitabuuja, tudi tutwàla mwànà wa mu dibòko ewu kùdi Nzambì, bwà kusàkidila bwà kumutwàla kaaba aka, ne kulòmba Nzambì bwà kumubènesha, ke citùdi tubiikila ne “dilàmbula dyà mwànà.”

<sup>18</sup> Mpindyewu, nudi bamanyè mùmvwa kwenza bwà bânà bàànyì sungasunga. Ndi ne mwànà mukèsè wa bakàji mu Butùmbi dilòòlò edi, ne yèyè wàkalàmbudiibwa kùdi Mukalenge, ku cyoshelu eku. Ndi ne mwànà wa balùme mutekète ne wa bakàji basòmbe paanyimà pààpa, dilòòlò edi, bàdi kacya kabàyì bânjiku kubàtijiibwa nànsha. Umwe, wa bidimu dikùmi ne ne cimwè, mvwa ngàakula nendè pa bwalu abu leelù ewu, n’Sarah, bwà dibàtiiza. Kàdi Joseph yèyè ùdi ànu ne bidimu mwandamutekète, pa nànku ùcidi mwànà mutekète bikolè bwà bwalu abu, too ne . . . Piikalàye ùdijinga, kàbidi wàmba ne Nzambì mmumutèèka dijinga adi mu mwoyi, dībà adi ndi mwà kumubàtiiza. Kàdi, bwà bânà bà mu mabòko, ndi ànu mbàlambula kùdi Mukalenge cyanàànà, bwalu adi ke dilongesha dyàdi dyà mu Mifùndu.

<sup>19</sup> Mwanèètù Neville, bu wèwè mwà kuseemenakù naanyì mpindyewu kùdi nsongàalùmè mulenga ewu. Mvwa ncìina . . . Awu ke Hollin anyi? Hollin? Eyowà, Hollin, Junior. Stephen Hollin. Èe, mbìmpe. Kaa, mvwa ngèèla meeji ne ùvwa mulààle. Ki ngiikàdilù wa ba-Hickerson nyèyè awu, kwòkò cintu kanà cyònsò eci munkaci mwà kwenzeka. Mèmè kumumòna ditùkù adi, mèmè kwamba ne “Mfùmù wa ditunga,” ne bikwàbò. Nènku, mu bushùwà bwà bwalu, aci cìvwa cikesè menemene bwèndè yèyè, nwamònu’s, bwà kwakula bwèndè yèyè bu “Mfùmù wa ditunga.” Wetwàwù? Èè, ndi mumanyè ne aci cidi ne cyà kwikala bubanji bunène kùdi maamù kanà yònsò wa difwànà dyà Nzambì ewù. Kanwènaayikù nwela meeji nànku anyi? Wa maalu malenga be. Nènku mpindyewu, Mwanèètù Hickerson ne Mwanèètù wa bakàji Hickerson, bu musadidi wa Kilistò, bu mpaasàtà wenù, ndi ngàngata mwànà ewu, ku diitabuuja,

mmutèka mu mabòkò à Yesù Kilstò, Mwena mu mabòkò Èndè munùdì nujinga bwà kumutèèka amu.

<sup>20</sup> Twinyikàayi mitù yèètù pàdì mpaasàtà ne mèmè biimàne mwaba ewu ne byanza byètù pambidi pàà mwànà wa mu dibòkò ewu apa.

<sup>21</sup> Taatù wetù wa mu Dyulu, mu Bible bàakakutwàdila bânà bakesè, bwà Wèwè kubàtentekela byanza Byèbè ne kubàbènesha. Ne cyà bushùwà, Mukalenge, bàvwa babènèshìibwe. Nènku mpindyewu bwà kulonda cileejilu Cyèbè, bintu biWàkenza abi, tudi batèete ne ntèmà yònsò, Mukalenge, mu dibala Bible ne dilonda cileejilu ànu Múvwà mwenze. Nènku taatù ne maamù ewu, Mwanèètù wa balùme ne Mwanèètù wa bakàjì Hickerson, bayiidi bèètù bananga mu tabernacle emu, mbòbò aba batùtwàdile cintu cikesè eci cyà disànka cyŪdì mutèeke mu bukùbì bwàbò. Ncifùmine kŪdì, Mukalenge. Udi mubàpèèshe mwànà ewu. Nènku mpindyewu bàdi bàjinga kufila mwôyi wèndè mukesè kŪdì, bwà kwikalayè ku mudimu Wèbè. Ndi ndomba bwà Wèwè kubènesha mwànà ewu, bwà Wèwè kumupèèshe mwoyi mule. Swàkù bwà ikalè ne mwoyi, bu byòbì mwà kwenzeka, bwà kumòna Dilwa dyà Mukalenge. Ndi ndòmba bwà Wèwè kumubènesha kwònsò kùdiye ùsanganyiiibwa. Swàkù bwà ikalè mukolèshìibwe mu nzùbu wa beena Kilstò, bu mudiye muledìbwemù. Swàkù atungunuke mu nzùbu ewu. Swàkù bwà taatù ne maamù bìikalè ne mwoyi bwà kumòna mwànà awu mu cyambilu, bu byòbì mwà kwenzeka, ùyiisha Èvànjeeliyò. Mbafwànyine kujinga bwà kumumònà mùshindù awu, Taatù, kupita pa—pa nkwasà wa bumfùmù wa Maison Blanche, anyi mwaba kanà mukwàbò wònsò, bwalu mbasadidi Bèèbè, ne bajinga ne mwoyi wà mwànà mutòoke ewu kwikalawù dilàmbudiibwa ne dibènesha ku mudimu wà Nzambi.

<sup>22</sup> Mpindyewu ndi ndòmba, Taatù, bwà Wèwè kubènesha mwànà ewu. Nènku swàkù bwà ngàsà wa Nzambi àmupwekèlè, ne swàkù bwà ikalè ne mubidi tumatuma ne disànkà matùku èndè ònsò àà mwoyi. Kàbidi anyishà bwà taatù ne maamù bìikale ne mwoyi bwà kumumònà ùkola, mmutùdì tulòmba kàbidi. Mubènèshaaku mutùdì tumubènèsha mu Dìna Dyèbè.

<sup>23</sup> Nènku mpindyewu, Stephen Hollin Hickerson mwànà ewu, ndi nkufila kùdì Yesù Kilstò, bwà mabènesha atùdì balòmbe amonà mwà kulwa pambidi pèèbè. Ikàlà ne mubidi tumatuma ne dikàndà, mwakunyàànyì wa balùme, ne swàkù bwà wèwè kwikala ne mwoyi bwà kutùmbisha Nzambi. Mu Dìna dyà Yesù Kilstò mmutùdì tucilòmba nùnkù. Amen.

Nzambi àkubènèshè. Nzambi ànubènèshè bònsò. Mwànà wa mu dibòkò wa kalolo awu.

Kutwikalà katùyì mwà kukùlàkaja nànsha,  
katwàdyàkukùlakaja nànsha,

Mu Buloba mutwikalà katùyì mwà kukùlaja  
 nànsha;  
 Katwàdyàkukùlaja nànsha,  
 katwàdyàkukùlakaja nànsha,  
 Mu Buloba mutwikalà katùyì mwà kukùlakaja  
 nànsha.

<sup>24</sup> Kabyàkwikala bilenga anyi? Bansongà nebiikalè bakùlumpè, ne banunu nebiikale bansongà. Mpindyewu, abi kî mbilenga anyi? Ne katwàdyàkusaama nànsha, anyi katwàdyàkubungama nànsha, anyi katwàdyàkufwà nànsha.

<sup>25</sup> Mpindyewu, masangisha, Mwanèètù Neville mmumanyishè. Ndi muswè kumanyisha mpindyewu, kàbìdì, ne masangisha awu, kanùapu mwoyi to, ne masangisha adiye mwàmbe awu. Kàbìdì, Màndamù Ford ùwà ne ciibidilu cyà kulwa mu èkèleeziyà emu kùkaadi bidimu awu, ngaakamufikisha kùdì mwanèndè wa bakàji, kùkaadi matùkù àbìdì, ne yèyè ùkaadi ne bidimu makumi mwandamukùlù, ne muye katwilangana ne Mukalenge makèlèlè dilòlò awu pa dîbà mwandamukùlù, ngèèla meeji. Ne masangisha èndè, mpaasàtà ne mèmè netùenzè ku nzùbu wa Nzambi wa Coots' Mu diisàtù, pa dîbà dikumi ne tusunsa makumi asatu, mu diisàtù dilwalwà edi. Màndamù Ford, Màndàmù. . . Ngèèla meeji ne ngàpù mwoyi cìvwà wèndè. . . Levi, Màndàmù Levi Ford. Wetù. . . Ki—ki mamwèndè wa Lloyd Ford unùtù numòna mu mukàndà wànyì awu, bwà ne ùwà ne cyà kundamina nkooçi wa Baa Nsukutu awu, ne nakapeta ànu cibelu cìmwè cyà mùpanù cìvwà cishààle. Mpindyewu, awu's—awu's ke mamwèndè wa nsongààlùme awu. Pa nàнку nakabànda nèndè ditùkù adi ne mèmè kusambila nèndè, mukùlakaje nèbèbe awu. Kàdi wàyi katuutakeena ne Mukalenge Yesù.

<sup>26</sup> Mpindyewu, bu Mukalenge mwà kwanyisha, mvwa ne cintu kampànda kaaba aka cìndì mufwànyine kumanyisha bwà masangisha awu, wòwò menzeke bwà lumingu lùdì lùlonda elu, bu mèmè muàteeke mwaba ewu, anyi pàngà apa mvwa mwele meeji ne mvwa muàtèèke, pa cìmvwà ne cyà kwakulapu bwà di—di—disangisha dilwalwà, dilwalwà dyà lumingu lùdì lùlonda elu. Mèmè mwà—ndi ngèèla meeji ne. . . Mvwa ngèèla meeji ne mwa muciteeka mu mukàndà ewu, ncyèna mumanyè ní mvwa muciteekamu anyi to. Èyowà, ncyòçi eci. Bu Mukalenge mwà kwanyisha, mu diisambòmbò dilòlò ndi muswè kuyiisha pa cyena—bwalu cyà “Bwà cinyi muntu umwèpelè ùdi ne bwenzeji pa nsòmbelu wa mukwàbò.” Kàdi mu dyàlumingu mu dìndà ndi muswè kuyiisha pa “Dyasa dyà mùsongà ku cipaapu cyà musàkà.” Nènku mu dyàlumingu dilòlò ndi muswè kuyiisha pa *Mulombodi Wanyì*, cyena—bwalu cyà ne: *Mulombodi Wanyì*, bwà dilòlò dyà dyàlumingu dilwalwà edi. Mpindyewu Mukalenge àbèneshèku bintu abi ne ankwàcishèku, bu múmvwà mupàtùke, ne ndi ànu ne mifùndu mikesè bwà kubileeja.

<sup>27</sup> Mpindyewu dilòlò edi, tudi baswè kulwijakaja ne kupeta

ndambù wa bintu. Byôbì biine, ndi ne mukàndà mumfùndila mwab'ewu ùdi—ùdi ùfùminaku ku dimata mu kashèètà, mùdi Billy ùcifùminaku ku diwàngata kùkaadi katancì, bwà ne bânà bèètù bàà balùme bàdi mu Michigan, ne ewu ùdi ùfùmina mu nsangilu wa bambi udi ne bintu byàbúngi. Acì's ke cidì cisopakaja bintu, nudi numòna's. Bwalu bùdi ne, bàdi bàm bamù ne kùdi bânà bèètù kuntwaku bàdi bàm ba ne mèmè ndi mubàtùme kuntwaku, ne bàdi munkacì mwà kuyiisha ne balùme bàw wa ne cyà kubènga bakàji bààbò ne kukèba munanga wabò wa nyumà, kàbidì ne—ne mèmè ncyèna mwà kupangila nànsha. Ne kakwèna cintu nànsha cìmwè. . . Kàdi, kah, mbìmwè byà ku bintu bìdi byènza bwòwà binùdi kacya kanùyì bânji kumvwa nànsha. Nènku nsangilu wa beena mudimu wà bwambi mmucibàkùle, ne mbamfùndile mukàndà bwà bwalu abu, ne mèmè ngudi mubàtùme kuntu aku kàdi ncilele cimvundù cyàbúngi. Kàdi bamwè bàà ku bòbò bàm ba cipròfètà bàm ba ne muntu kampànda ùw wa ne cyà kubenga mukajèndè ewu ne kusela mukwàbò wàw wa. Mpindyewu, èkèleeziyà ewu mmumanyè ne twètù katùtu tutwà macimbu à nànku awu nyama ku mikòlò to.

<sup>28</sup> Tudi twitabuuja Bible. Tudi twitabuuja ne pàdi muntu wàngata mukàji, ki mukajèndè awu, ne ànu lufù ke lùdi mwà kubàtápulula. Anu aci nkayaaci. Twètù katùtu twitabuuja bintàkanyì byà mùshindù awu to. Twètù katùtu twitabuuja dibanjijangana to, nànsha. Twètù katwèna twitabuuja bintu abi to. Kakùyì mpatà to tudi twitabuuja Bible, ne ànu Yèyè nkàayèndè. Pa nànku nemvudijè mukàndà awu, dibèji dya wòwò mukàndà mumfùndila awu, ne kufilakù dyànyì dyandamuna ne kuditeèka mu bibèjibeji, nènku cyòci aci necì—aci necitabaleele bwalu abu. Ndi ntèkemena ne necyènza nànku, nànsha bishi, necibàpe dyandamuna.

<sup>29</sup> Mpindyewu dilòlò edi, ànu kumpàla mene kwà kukangula Mifùndu, twànjààyì kwakula ne Mukalenge wetù.

<sup>30</sup> Taatù wetù wa mu Dyulu, nyèwù tuseemena pabwìpi ne Nkwasa Webè wa butùmbi wa ngàsà, mu Dìna dya Mukalenge Yesù, Munène awu Wàkatùùluka mu Butùmbi bwà kutùvungulwila mabanji à mu bibùcila byà Nzambi. Mùshindù mwinè utùdi tuKusàkidila bwà Yesù munène ewu Uvwa dimwèneshiibwa dya Nzambi, ditùpa twètù sungasunga, ne ku Yèyè tudi ne bupikudi ku mpèkaatù yètù. Nènku tudi mpindyewu buumuke ku lufù bayè ku Mwoyi, bwalu tudi baMwitàbùùje. Bwalu mbafunde Bwèndè, bwà ne Wàkamba ne: “Ewu udi umvwa Méyì Àànyì ne witabuuja Ewu udi muNtùme, ùdi ne Mwoyi wà kashidi; ne kààkupìcila ku cilumbulwidi to, kàdi wàm anyì kuumuka ku lufù muyè ku Mwoyi.”

<sup>31</sup> Bènesàku Méyì Èbè, dilòlò edi, Mukalenge. Nènku tudi mwaba ewu mbwà kwangata mèèsà à Mukalenge ànu mu cikondo cìpi cyanààna. Beena Kìlistò, beena mwàbò bàà



Bukalenge nebàsangilè ku byoshelu, nènku kwòkò aku ke kwàngatàbò citùdì tubiikila ne “mèèsà à Mukalenge,” ka—kapesa kakesè kàà—kàà mushingà wuùdi Wèwè mutùshiiile awu, bwà kuleeja ne tudi twitabuuja ne Wèwè udi mufwè bwà mpèkaatù yètù, ne mubiike ku lufù mu ditùkù diisátù, ne mwikàle ne mwoyi kashidi ne kashidi, ne munkaci mwà kwenza cyòci eci too ne muWàlukila, bilondèshile Mifùndu mutùdi batùminyìibwe díyì. Jidilaaku myoyi yètù ùyuumushe ku meeji mabi ne ku byònsò bitùdi benze bivwa bibengangana ne diswa Dyèbè dinène. Taatù, tufwìlèku luse, ne tùpèèshèku ngàsà Webè dilòlò edi. Tucibwilaku Dyàmpà dyà Mwoyi, mu Díyì, bu mutùdi tuDibala ne twakulaPù. Mu Dìná dyà Mukalenge Yesù, tudi tulòmba nùku. Amen.

<sup>32</sup> Mpindyewu mu Mukàndà wà Bwàkabuulwibwà, kubangila ànu ku mvensà umwèpelè, ndi njinga kubala mvensà wa 20, anyì mvensà wa 1 wa nshapità wa 20.

*Ngàakamòna mwanjèlo ùtùluka mu dyulu, mwikale ne nsapì yà ciina cile ne mùyòdòlolo munène mu cyanza cyèndè.*

<sup>33</sup> Mpindyewu ndi njinga kwakula, byòbì mwà kwenzeka, mèmè mwà kwangatamù cyena bwalu, anyì kupàtula dyumvwija mu cyena bwalu eci, bwà tusunsa makùmi àbìdì anyì makùmi àbìdì ne tùtaanu tùdì tùlonda, ndi njinga kucinyika ne: *Lusapì Bwà Cìibi*. Mpindyewu, ncyèna njinga bwà—bwà kucivwija “nsapì ku búngì to,” bwalu Peetèlò wàkapèbwa “nsapì yà Bukalenge.” Kàdi ndi muswè kuyibiikila ne: *Lusapì Bwà Cìibi*. Nènku dibà adi dyàkàmwè paanyimà pàà cyòci eci, ndi njinga kufilakù mèyì makesè à kwela nseka pa mèèsà à Mukalenge, kumpàla kwà twètù kuàngata dilòlò edi.

<sup>34</sup> Mpindyewu, lusapì. Ndi mmòna kaaba aka patùdì tubala apa, ne Mwanjèlo ewu wàkatùluka mu Dyulu, mwikàle ne lusapì mu cyanza cyèndè. Ngèèla meeji ne m’Bwàkabuulwibwà 13 anyì 19, tudi tusangana kàbìdì, Mwanjèlo mukwàbò ùlwa ne lusapì. Nènku lusapì lùdi, kiipàcila kàà lusapì, nkàà kukàngula cintu kampànda, cintu kampànda cidì cikàngiibwe, anyì ncintu cìvwà ne cyà kwikala cikàngiibwe. Kàdi lusapì ndufidiibwe bwà kiipàcila aku.

<sup>35</sup> Mpindyewu, kùdi mishindù kabùkabù yà nsapì, bwalu tudi ne midimu yàbúngì ne nsapì. Kùdi nsapì yà ku mayeebà. Kùdi lusapì lwà nzùbu webè mwinè, kùdi lusapì lwà mashingyì èbè. ne tudi tuyibiikila ànu ne nsapì, ne yòyì n’nsapì. Ne bàdi mwà kuyivudija, misangu yàbúngì. Anyì yà ku nzùbu, bàdi mwà kuyenza misangu mikwàbò, yitùtù tubiikila ne nyà yikàngula bikùvu byònsò. Mu ngaakwìlù mukwàbò, n’lusapì lùdi lwenza ne twamù, tùdì tunwàngana, tùdì—tùdì tunyunguluja cikùvu tùcítuma luseke kampànda ne tùdì mwà kukàngula ciibi pàmwè ne cyònsò, bayibiikila ne “lusapì lùdi lukàngula cikuvu cyònsò.”

N'lusapì lwenza bwà kupetangana ne nsapì yàbùngì, ne yìdi mwà kukangula mùshindù awu, nzùbu yètù too ne màshinyì ètù mene, bàdi mwà kuyìvudija. Ne dîbà adi kùdi . . .

<sup>36</sup> Lusapì kanà lwònsò elu kalwèna mwà kukangula ciibi pàdi cyanza kaciyì cilùkwàte nànsha. Bidì bikèngela kwikalè cintu kampànda cidi mwà kunyunguluja lusapì alu. Kàdi lusapì nkààyaalù kalwèna mwà kudinyunguluja to. Bidì bikèngela kwikalè cintu kampànda cidi ne cyà kunyunguluja lusapì.

<sup>37</sup> Ncyenze ànu bu cikòlokolo cìndi—cìndi ngàakwilakù eci. Cikòlokolo aci ncipùwe. Pàdi ànu cintu kampànda kaciyì cyàkwilekù, kaciyèna mwà kwakwila mu cyôci ciinè to. Cidi ne cyà kwikala ne cintu kampànda cidi mwà kwakwilakù. Pa nanku, kí ncikòlokolo to, ndiyì anyi mu—mutooyi (ùdi paanyimà pààci) ùdi cikòlokolo cisambuluja ku—nkwaka wa lupepèlè, ku dici dyèbè.

<sup>38</sup> Mpindyewu, mùshindù awu ngùdibi mu kuyiisha kwà Èvànjeeliyò. Kí n'twètù biine, bu bambi to, twètù katwèna Èvànjeeliyò to. Kàdi tudi ànu basambuluji bàdi bàsambuluja Dìyì dyà mukana mwà Nzambì kupìcila ku mudimu wètù, kùdi bantu, batèeleji.

<sup>39</sup> Cikèèna—kumòna cidi mùshindù wùmwèwùmwè awu. Ncyèna mumanyè cintu nànsha cìmwè cyà kwambila èkèleeziyà pa dîbà edi pa bidì bitàngilà cikèèna—kumòna to. Kàdi Nyumà Mwímpe yèyè muswè kundeeja, dyàmbedi, cikèèna—kumòna, dîbà adi ndi nsambuluji cikèèna—kumòna aci kùdi ewu udici ciludikila. Pa nànkù kacivwa cyànyì, mèmè to, cikèèna—kumòna kacivwa mèmè to, kí mmèmè to. Nzambì ke uvwa mufile cikèèna—kumòna, kàdi mèmè mvwa mwenze ànu bu musambuluji, bwà kupàtula mukenji wà cikèèna—kumòna kùdi bantu.

<sup>40</sup> Mpindyewu, lusapì lùdi cintu cìmwècìmwè aci. Mfwilaayi luse. Lusapì lùdi ànu cintu cidi ne cyà kukwàciibwa mu cyanza cidi cikàngula ciibi. Nwamònu's, bikèngela ciikale cyanza. Mpindyewu, mu lusapì lungiikalà ne cyà kwakulapù dilòlò edi, kùdi cyanza ànu cìmwèpelè cidi mwà kulama lusapì alu, ne cyôci aci n'cyanza cyà diitabuuja. Ke cintu cìmwèpelè cidi mwà—mwà kulama lusapì elu. Kàdi byanza bitu bilama nsapì mikwàbò, nènku bidì bikèngela cyanza cyà diitabuuja bwà yôyi ayi.

<sup>41</sup> Mpindyewu, tudi twangata bu mùdi lusapì lwà dimanya. Mpindyewu, muntu ùdi ne cyà, pìikalàye muswè kukùngwija dimanya ku dikwàbò, nwamònu's, mpindyewu, kùdi lusapì bwà cyôci aci. Kùdi mùshindù ùdi muntu ewu ne cyà kukàngula. Bikèngela ikalè. . .bwà kupeta mikàndà yèndè ne dilonga dyèndè dyà tùlaasà, kàdi kèna mwà. . .muntu nànsha umwe kèna mwà kumulongela to. Mbafwànyìne kumulongesha, kàdi yèyè ùdi ne cyà kulonga. Ne mùshindù ùmwèpelè ùdici mwà kwenjiibwa, yèyè ùdi ne cyà kubàkula lusapì alu,

cintu kampànda munda amu cidi civùngulula anyi ci-... cimubuulwila dimanya didiye munkaci mwà kukèba adi.

<sup>42</sup> Kàdi kùdi bantu bàdi bu bafwànyine kuteeta kwimba pyàno, nènku bàdi. . . anyi mijiki. Ki mbamanyè mene mùdìbo bàcyenza to, kàdi bàvwa mwà kuya kuntu aku ne mulongeshi mufwànyine kwangata dìleesòna dilonda dìleesòna, kàdi kabàyi ànu bafwànyine kudiyiila nànsha. Kabàyi ànu mwà kulama lusapì alu bwà bwalu busokoka abu to, mùdì cikùmà ne byonà byà dinwàngana ne byònsò bibwelakanangana. Bidi bilòmba lusapì.

<sup>43</sup> Ne makùmi, kùdi lusapì bwà makùmi, mu mùshindù wà ne udi ne cyà kuàshikuluja. Nkàdikù mumòne bantu bàvwa mwà kwangata milongo yinaayi yà nombà, kàdi kutèeka minu yàbò, wònsò wà ku minu yàbò inaayi pa mulongo wà nombà, kàdi kwenda kupweka ànu mùshindù *awu* too ne ku milongo yitaanu anyi yisambòmbò ne kwinshì, kàdi kutèeka dyàndamuna lwà kwinshi aku. Bàvwa mwà kusangisha milongo yinaayi musangu wùmwe, kubangila ní mpenyi pwònsò kubangila ku ùmwè too ne ku citèemà. Èè, mèmè ndi ne lutàtu lwà kusangisha mulongo ùmwè, ambà ànu mèmè ne minu ne twànà twà nkasà búngì bukùmbàne byà mèmè kubadika, bwà—bwà kubadika mulongo ùmwèpelè. Mèmè ncitukù mwà kupeta alu lusapì nànsha. Kàdi, nudi numòna's, bàmwè bàà kùdìbo bàdi ànu ne lusapì alu, mbamanyè mwà kucyenza.

<sup>44</sup> Nènku kùdi lusapì lwà dimanya, bwà muntu udi wenda ukebangana ne dimanya. Kùdi lusapì lwà maalù à mamanya, lukèbukebu lwà maalù à mamanya. Mpindyewu, kùdi, alu's n'lusapì lunène. Bantu bàdi bàkèba lusapì alu.

<sup>45</sup> Bu mùdì kwenji cikondo bàkapeta kapwshipwishi, e kumanyabò ne kùvwa tupwshipwishi, nènku pashiishe tupwshipwishi kwenzatù tusùnsukila ne bikwàbò byònsò. Mpindyewu, mbaditwe mu lukèbukebu, muntu kampànda ùvwa wítabuujà ne bu kapwshipwishi aku mwà kulamakaja bintu byònsò pàmwè, bu kapwshipwishi aku mwà kunyùngùlujiibwa, aci civwa mwà kwenza ne kàdiku mwà kwangata cidiku kalamè aci ne kucivìngutula. Bwalu, bintu byònsò mbilamakaja kùdi kapwshipwishi, tudi bamanyè aci. Mpindyewu, dikunji adi ndilamakaja ne tupwshipwishi. Nudi balamakaja kùdi tupwshipwishi. Mashinda, mici, bintu byònsò mbilamakaja ne tupwshipwishi. Èè, bu kapwshipwishi aku, kàdi kanyùnguluka lusekè lùmwe aka, bu kwòkò mwà kuzaajiibwa ne kunyùnguluka luseke lukwàbò, díbà adi nkafwànyine kubùtula bintu. Nènku, mpindyewu, beena maalù à mamanya banène bàdi biitabuujà ne aci cidi mwà kwenjiibwa, ne mbenzè mudimu wèbè wà mukùsu muyè paanyimà, e kusòmbabù díbà ne díbà, lumingu ne lumingu, cidimu ne cidimu, too ne mùvwilàbo kucicimuna ndekeelu wa byònsò.

46 Ùvwa, ngèèla meeji, Thomas Edison, pa bukênkè, mùdìbo bàmba ne muntu ewu ùvwa ne dimanya dyà ne ùvwa mwà kwenza bukênke ne nzembu. Yèyè ke mupàtudi wa ampoule wa bukênke. Ne kàvwa nànsha ùya kalààla butùkù to. Ùvwa ùkwàta dyàmpa dyela munyiinyi mu cyanza ùdya cyàkudyà cyèndè, ne ùsòmba mwaba awu wèla meeji ne wènza mudimu. Mwaba kampànda lwà mu meeji èndè, cintu kampànda cìvwa cimwambila ne ùvwa mwà kucyènza. Ncinyi aci? N'lusapì lùdì mwà kukàngula njila.

47 Ki nkwanji kwenza bidimu byàbûngì to, kuvwa mu—muntu uywa witabuujà ne ùvwa ne dimanya dyà kufùnda byà kuseka. Ùvwa witabuujà ne ùvwa ne lusapì mu cyanza cyèndè. Kàdi ùvwa muswè...kuyayè...Ùvwa musòmbèle mu Kansas. Ke kuyayè kùdì mufùndi munène wà cibèjibeji cinène mu Kansas City, e kumutwàdilayè yimwè yà ku mifùndù yèndè. Ki mufùndi awu kwambayè ne: “Mukalenge, kwèna ànu naaci to. Wèwè, kabyèna bikèngela bwà kuteeta to, kwèna—kwèna mwà kucyènza to.” Kàdi aci kacyakamusànkisha to. Ùvwa mumanyè ne ùvwa naaci. E kwalukilaye kwòkò aku cyàkàbìdì, ùteeta ànu kuteeta, kàdi yèyè (mufùndi wa cibèjibeji awu) ùvwa ànu ùmudyombola. Ndekeelu wà byònsò, e kuyayè myaba mikwàbò, e kumudyombolabò, bàmba ne: “Mukalenge, kwèna ànu naaci to. Kwèna mwà kucyènza to.” Kàdi nànsha nànkù yèyè ùvwa mwitàbùùje ne ùvwa mwà kucyènza. Nènku ki mùdìbi, ùdì ne cintu kampànda mu cyanza cyèndè! Ndekeelu wa byònsò, e kupetayè mudimu wà difùnda tuubyena bwalu tukesè, ngèèla meeji, cibèjibeji anyi cintu kampànda bwà èkèleeziyà, cintu kampànda cyà kuseka bwà èkèleeziyà. E kufucilayè cilongolwedi cyà màshinyi cyà bwalu aci citàpile mpùku -anyi nkwose's bu mèshì, mwinè amu mmuvwa nkwose yitàmbakana eku ne eku, ne byònsò abi mu mabèjì èndè amu, e kufikayè ku dimòna disunguluka dyà kankwose kampànda. Ke mwaba awu ùdì bwalu bulonda bwà Mickey Mouse bulediibwe. Mpindyewu ùkaadi Walt Disney mwena tètè mu nzùbu tètè pambèlu. Bwa cinyi? Ùvwa ne cintu kampànda mu cyanza cyèndè, ne ùvwa mumanyè ne ùvwa mucikwate my cyanza, ùvwa mumanyè ne ùvwa mwà kucyènza. Nènku ke mùtù bintu binène byònsò ebi byenjiiibwe. Dìbà dìdì balùme ne bakàjì biikàle ne cintu kampànda mu cyanza cyàbò, cìdìbo bamanyè ne bàdì mwà kucyènza.

48 Pàakabùdikà tunèkè mu ditùnga edi. Ànu, mùdìbo bàtùtumina bònsò dīyì bwà twètù kuya kangata cisàlu, bwà kutùjikija. Pàakabùdikà tunèkè...Makeèlèlè mvwa ngènda ndonda ngàngàbukà kampànda ku cisanji pàmvwà ngèndesha màshinyi mu njila, ngàngàbukà kampànda wa ku Louisville. Kwambayè ne: “Kukaadi bidimu ndambù, pàvwà cipùpu cinène cikwàte Louisville,” yèyè ne: “bu bantu mwà kwimanyina mwaba ùmvwà mwimanyine, ne bamòne

byamù byà dipuuyakeena makumi àtaanu ne mwandamutekète musangu umwèpelè, ne balùme, bakàjì, bansongààlùme ne bansongààkàjì, bacìbwila panshi kùdì dìsaama bàdìbìikila ne ‘tunèkè,’ dyà bwalu kakùyì cintu nànsha cimwè cìvwà mwà kwenjiibwa bwà bwalu bwàdì to.” Yèyè ne: “Kacya ncitukù muswè kumòna cintu cyà mùshindù awu kàbìdì to.”

<sup>49</sup> Kàdì maalu à mamanya àvwa èla meeji ne: “Pìikalàku cintu cibi nàнку awu bu mùdì tunèkè, kùdì ne cyàkwikala menemene cintu kampànda cyà kucikàndameena naaci.” E kulwanganabò, kwimanabò mu misèèsù ne bikumbà, bajìmì bàà midilu abu, e kutùulabò bifulu ku mitù, e kulòmbabò byà pa luse, kucyùlabò, kwenzabò byònsò bìvwà bikèngela kwenza, bàteeta bwà kupeta lusapì bwà kukàngula ciibi cyà budiikadidi. Kàdì, ndekeelu wa byònsò, muntu wa dipòkò kampànda mwena Kilistò dìnà dyèndè Salk e kupetayè cisàlu. Bwà cinyi? Kùvwa bubi bùvwa bùtwa bùpela, mushipyanganyi ùvwa ùtwa ùpela; kùvwa lusapì mwaba kampànda, lùvwa mwà kukàngula cyàkàbìdì budiikadidi bwà muntu, nènku cisàlù cyà Salk cìvwa bwanga bunène. Kaa, cidi lusapì mwà kwenza’s! Cisàlu cyàkapàtudiibwa, ne mpindyewu bàdì munkaci mwà kujikija tunèkè ne cisàlu eci, bwaàlu cyòcì aci cìvwa “kubènga kupùngila ne kubènga kulekela,” lusapì alu lùvwa lulàla mwaba kampànda. Kùvwa cintu kampànda cìvwà cìfwànyine kusàla naaci bantu, ne bàvwa bangàte dipàngadika dyà kucipeta.

<sup>50</sup> Kàdì kwòkò kwikàle bubèèdì bu bwà tunèkè, byà pa muminu, mbàlàngà, mubidi luuyà, tetanosè, dyuminyina dyà mbàngà ne bikwàbò, màsaama aa, àdì maalu à mamanya, malwishè mafùdishè, munya ne butùkù, too ne mùdìbo bapeté cisàlù cyàwù, bwalu ndìsaama, dyòdì ndishipyanganyi, munyì mùdikù kutàmba kwikala lusapì lwà lupàndu bwà muntu udi usanganyibwa mu nzùbu wa bùlokò bwà mpèkaatù? Kùdì lusapì bwà ciibi aci, bwà kupeesha bantu budìshikaminyi ku cyòcì aci.

<sup>51</sup> Lusapì, pa ciibidilu, pàdìlu lùkàngula cikùvu, ne, dìbà dyùdi upeta lusapì, lùdì ne cyà kwikala bwà bubanji kampànda, cintu kampànda cyà mushinga mukolè, cyanààna kùvwa mufwànyine nànsha kucikànga to. Cyòcì kaciyì ne mushinga bwà kukàngiiwbaci to, cilekèle ànu’s. Kàdì cyòcì ne mushinga bwà kucikanga! Pa nàнку lusapì pa ciibidilu lùdì—lùdikù mbwà kufika ku cintu kampànda, anyì mùshindù wà kufika ku cintu kampànda cyà mushinga mukolè. Lusapì alu, ki mudimu wààlù ngwòwù awu, mpindyewu, nelùkangule cintu kampànda, cyà mushinga mukolè.

<sup>52</sup> Mpindyewu tudi tubala mu Yone Munsantu, nshapità wa 10, Yesù mmwambe ne: “Ndi Ciibi cyà mushiku wa mbèlù wà mikòòkò. Mémè ndi Ciibi,” kì n’kaaciibi *kampànda* to, “Ciibi aci, Ciibi cimwèpelè. Mémè ndi Njila, Njila umwèpelè, Bulelèlè, ne Mwoyi, ne muntu nànsha umwe kèna ùlwa kùdì Taatù pàdiye kàyì mupicile kùndì Mémè to. Mémè ndi Ciibi cyà mushikù wà

mbèlù wà mikòòkò ne bònsò bàakalwa kumpàla kwànyì mbeena lukuna, bìvì ne banyèngì.” Yèyè ùdi Ciibi cyà mushìkù wà mbèlù wà mikòòkò. Ùdi Ciibi cyà lupàndu.

<sup>53</sup> “Kakwèna dīngà dīnà difidiibwe mwinshì mwà Dyulu dinùdì ne cyà kusùngidiibwa kùdidi to, ànu ku Dīnà dyà Yesù Kilistò.” Èkèleeziyà nànsha umwe, dīngumba nànsha dīmwe, twitabaayi nànsha umwe, malongesha à cintu nànsha cīmwe cyònsò; ànu ku Dīnà dyà Yesù. Ki—ki Lusapì ndwòlù alu. Kabyèna bikèmesha to pàvwà Peetèlò mufwànyine kukwàta mudimu ne lùmwe yà ku yòyì mu Ditùkù dyà Mpenta! Bàvwa baswè kumanya mwà kubwela mu Ciibi aci. Wàkakwàta mudimu ne Lusapì alu. Ne kùdi Lusapì ànu lùmwepelè, bwalu kùdi Ciibi ànu cīmwepelè. “Mémè ndi Ciibi.” Ne Peetèlò ùvwa ne Lusapì lwàCì. Ki yèyè ne: “Nyingàlalaayi, yònsò wa kunùdi, nùbatijjibwè mu Dīnà dyà Yesù Kilistò bwà dilekelediibwa dyà mpèkaatù yènu, nènku nenùpete mabanji à Nzambi.” Ke Lusapì lwà Ciibi alu’s, nènku Yesù ùdi Ciibi.

Kùdi Ciibi ànu cīmwepelè cyà dyondopa, ne Yesù ngudi Ciibi aci.

<sup>54</sup> Kùdi Ciibi ànu cīmwepelè cyà ditalala. Èyowà. “Ditalala Dyànyì ndi nupèeshadi.” Yèyè ùdi Ciibi cīmwepelè cyà ditalala dishùwashùwàlè. Udi mufwànyine kwela meeji ne udi ne ditalala. Udi mwà kukùngwija mfranga mikùmbàne bwà kusùmba nzùbu webè, udi mwà kukùngwija mfranga mikùmbàne bwà kupetela bānà bèèbè bilāmbà, kupeta byākudyà bwà kudyà, kàdi udi mufwànyine kwikala mukùngwije luumu lukùmbàne bwà kwikala mumanyike munkaci mwà bantu. Kàdi dībà dyùdì ùvùlā bisàbaatà byèbè ku makàsà butùkù udilongolola bwà kudyòlola panshì, kùdi Cintu ànu Cīmwepelè cidì mwà kukùpèesha ditalala. Mbwena kwamba ne, bu wèwè mumanyè ne ùvwa ùpunga ne lufù dilòlò adi, kùdi Ditalala ànu dīmwepelè, nènku, mbwena kwamba ne, Yesù ki Ditalala adi. Yèyè ki Ditalala dyètù.

<sup>55</sup> Yèyè ùdi Dyondopiibwa dyètù. “Mémè ndi Mukalenge Nzambi webè udi wondopa māsāmā èbè ònsò.”

<sup>56</sup> Yèyè ki Ciibi cyà Dyulu. Ne kakwèna ciibi cikwàbò anyi njila mukwàbò to ànu wa kupìcila ku Yesù Kilistò. Yèyè ùdi Ciibi cyà Dyulu.

<sup>57</sup> Nènku mpindyewu Yesù ùdi Ciibi bwà bintu byònsò ebi, ne diitabuuja didi lusapì bwà kukàngula Ciibi eci. Mpindyewu, pìikalàbi ne Yesù ùdi Ciibi ku milayì yònsò yà Nzambi eyi, diitabuuja mu mudimu Wèndè mwowela byanza didi dikàngula ciibi ne ciibi cyònsò bwà kukafikisha ku bubanji bùdì busanganyibwa munda mwà Bukalenge bwà Nzambi. Nwàcimònu anyi? Lusapì lùdi . . . Diitabuja didi lusapì lùdi lùkàngula mulayì wònsò ùdiYe mwenze. Lusapì lwà diitabuuja

lùdi lwènza cyôci aci, diitabuuja mu mudimu Wëndè mwowela byanza. Mpa nsapì eyi ke patùdi twakwila.

<sup>58</sup> Mpindyewu mu Ebèlù, nshapità wa 11, ndi mufùnde mulongo mujimà wà kadyà-mashindè mwaba ewu, wà bilòbo byà diitabuuja ebi. Cìvwa n'lusapì, lwà-lwà Ciibi, lwà kakàngà mukana mwà ntambwe. Cìvwa n'lusapì, diitabuuja, lwàkakàngulà nzùbu yà bùlokò. Cìvwa ndiitabuuja, lusapì lwà diitabuuja, lwàkajimà cikisu cyà kapyà, kubàfukabo ku ditwà dyà mwelè wà mvità, kwaluja cyàkàbìdì bafwè ku mwoyi. Cìvwa ndiitabuuja, lusapì lwà diitabuuja mu Nzambì udi ne mwoyi. Cyanza aci, muntu mulùme awu, muntu mukàjì awu, udi mwà kwangata lusapì lwà diitabuuja alu, ùdi mwà kukàngula mulayi wònsò ùdi Nzambì mwenze. Kàdi wèwè kùyì ne lusapì alu to, udi ànu munkacì mwà kwelakana, kwàdyàkucikàngula to. Neùcilwanganyishè, bwalu lusapì elu. . .

<sup>59</sup> Lusapì kanà lwònsò lujalàme elu lùdi ne twamù munda mwà cikùvu amu, ne lùdi lwàngata mmwènekèlu kampànda, mbungakeenù kampànda wa nsapì bwà kunyunguluja twòtù twamù atu. Ànu kaamù kakesè cyanààna kwòkù kuumuke mu njila, nekàkòndakajè cintu cyònsò aci.

<sup>60</sup> Ki bwà cinyì, ndi ngiitabuuja Èvànjeeliyò mu kaabujimà, Dìyi dyònsò dyà Nzambì, didi dikàngula bukolè bwà Nzambì, didi dyàluja mabènesha Èndè kùdi cisàmbà. S'ki lusapì lwà Ciibi, lùdi lùCikàngula. Kaa, bilòbo binène abi, bapròfeta ne balùme banène bàà mu Bible abu, bàvwà ne lusapì alu abu's! Ki bwà cinyì bàvwa mwà kukanga mukana mwà ntambwe, kujimà cikisu cyà kapyà, kubàfuka ku ditwà dyà mwelè wà mvità, kwaluja bafwè ku mwoyi cyàkàbìdì, ne kwenza bishimà byà mishindù yònsò, mbwalu bàvwa balamè nsapì ayi ne bamanye ne yìvwa yìkwàta mudimu, bwalu yìvwa n'nsapì milela kùdi Mifùndu.

<sup>61</sup> Mpindyewu, mèmè mwikàle ngèèlakana ne nsapì yà twitabàayi, ncyèna mumanyè cyènzàyi to. Bòbò bàmba ne “èkèleeziyà wanyì ùdi ùlongesha *cikampànda*,” ncyèna mumanyè aci to.

<sup>62</sup> Kàdi pàdi Bible ùcilongesha, ne mèmè mukwatè lusapì lwà diitabuuja mu cyanza, anyi mu mwoyi wànyì, lùdi lwàmba ne: “aci n'Dìyi dyà Nzambì,” necijimè cikisu cyà kapyà, neyikangule lwondàpu bwà babèdì, neyikangulè lupàndu bwà bajimine. Bikèngela mèmè kulwa ku Ciibi, byònsò bìdi mu Dìna Dyèndè. “Cyònsò cyùdi wenza mu dîyi anyi mu cyenzenzi, enza byònsò mu Dìna Dyèndè.” Mumanye bìmpe ne lusapì lùdi naalù ndiitabuuja, bwalu n'lusapì lwènza ne Mifùndu. Mpindyewu, piikalàci n'lusapì lwà twitabàayi kampànda, lusapì lwà cyena dīgumba, ncyèna mumanyè cyènzàlu to. Kàdi piikalàyi lusapì lwà mu Mifùndu, nelùkangulè, bwalu Nzambì ngudi mwàmbe nànkù. Mpindyewu, kaa, kabyèna bikèmesha to bwà pàvwàbo

bafwànyine kwimanyika cikisu cyà kapyà, ne bikwàbò, bàvwa ne lusapì alu.

<sup>63</sup> Ku dishikula dyà mutù dyà kumpàla dyà Nzambi kùdi umwe wa ku baprófeta abu, kakùvwa cintu nànsha cimwè cìvwà mwà kubìimanyika to. Yèyè kàvwa ne cyà kwenza bu mutùYe ungenzela mîngà misangu nànsha, bwà kucituuta kucituutulula, pàmwàpa ne wèwè (ncyèna ntèkemena ne bìdi nàнку to), kàdi utùngunuka ne kungambila ne: “Nda ukenze cikampànda,” kadi piine apu wèwè wenda utètuka: “Nàнку nda ukenze *cikampànda*,” ne “Alùkilà ùkacyenze cyàkàbìdi, kùvwa mucyenze bîmpe to.” Ànu dishikula dikesè dyà mutù cyanààna! Ànu, bàvwa mwà kumvwa ànu Nyumà ùbàmbila ne: “Ke cyà kwenza ncyôci aci,” ne cintu nànsha cimwè kacýakubìimanyikaku to. Mwanèètù, bôbô—bôbô—bôbô bààkakànga mukana mwà nyama yà ntambwe, bààkapànduka ku ditwà dyà mwelè wa mvità, bààkajìma kapyà, bàkenza bintu byònsò. Ànu dishikula dikesè dyà mutù dyà Nzambi, bwalu bàvwa bakwatè lusapì mu cyanza, diitabuujà dinène adi! Bààkenza bintu bwà Nzambi bwalu cintu nànsha cimwè kacìvwàku mwa kubìimanyika to. Kaa, mùshindù mwinè wùdibi byà butùmbi’s wè!

<sup>64</sup> Ànu bu mwà kalwà nsongààlùme wa citende musangu kampànda kùdi mwanèètù mununu uvwa muntu wa difwàna dyà Nzambi, muprófeta mununu wa Nzambi. Nènku ùvwa ùmvwa muntu awu ùfilafila bujaadiki, díbà dyònsò ùlonda bwà bwîmpe bwà Nzambi, ne mùshindù ùvwà Nzambi, ne cìvwà Kilistò, mwikale ànu ùtùngunuka, wènda wàkula. Ndekeelu wa byònsò, nsongààlùme ewu ùvwa ne cyà kujidiibwa mu mudimu wà bwambi, ke kulwayè kùdi mununu kampànda wa lungenyi ewu, ki yèyè kumwambila ne: “Mukalenge, ndi muswè nkwelèku lukonko.”

Yèyè ne: “Nkonkààku, nsongààlùmè wa yààya.”

<sup>65</sup> Yèyè ne: “Kilistò ùdi ne mushinga wàbùngì menemene kùdi ànu bu mùdì wamba ne Ùdi naawu amu anyì?”

<sup>66</sup> Yèyè ne: “Ùdi ne mushinga wàbùngì kùndì kutàmba cìndì mwà kupatula mukana mwànyì bu mupùùya bwà kwakula!” Ki bwalu mbwòbù abu’s. Cìvwa ncinyì? Wàkasangana lusapì alu.

<sup>67</sup> Nsongààlùme awu kwambayè ne, pa cyôci aci: “Pawikala ujikula bintu ebi, kàbìdì ungambila ne mbilelèlè mùdì ubìngambila emu, díbà adi ndi muswè kumanya Yesù umweumwe awu, mu bulelèlè bùmwebùmwe ebu.” Cìvwa ncinyì aci? Wàkamanya ne muntu mununu awu ùvwa mukwàte lusapì, lùvwàye mwà kukànga ne kukangula naalù.

<sup>68</sup> Nudi bamanyè’s, lusapì lùdì lùkànga, lùdì lùkàngula, kàbìdì. Nwamònu anyì? Udi mwà kusuulula anyì kuswìka. Mmwòmò. Lusapì lùmweùmwe lùdì lùkànga, lùdì lùkàngula. Lusapì lùdì lùkàngula, lùdì mwà kukànga. Nènku aci mmwòmò menemene,



nwamònu's, bwalu lùdi lùkwàta mudimu mìshindù yònsò yìbìdì. Bìdi byènza luse be pa kumòna mùdi èkèleeziyà mujimije lùmònu lwendè lwà cyôci aci! Cìvwa cintu cyà dibungama kaayi pààkadìpàanyishà èkèleeziyà ku twitabàayi, bu mutùdi benze leelù ewu, kàdi tubiikilangana mpindyewu bwà kudisanga.

<sup>69</sup> Tudi bamòne mwikala bulondyananyi bunène bwà cyena Loomò ne bakwàbò abu ne cyà kutuutakeena mpindyewu, nebàshintulule yimwè ndongamu. Pàanyi's mvwa ndyàmbidila ne kabàvwa bashintuluke; kàdi nebàshintuluke, bìbandè bipwekè, bàpèèsha nsaserdòsè yònsò bukolè bwà paapà, ne—ne kwònsò kùdiye ùsanganyiibwa aku, ne bikwàbò. Byenza luse be, bwà mùdi èkèleeziyà ùdìfila ku bilèlè biswika pamutù pàà Dìyi. Nwamònu anyi? Awu ke mwaba ùdìbo bashiile lusapì, ànu pòpo apu. Ki bwà cinyi bishimà binène ne bimanyinu kabyèna byènzeka munkaci mwà bantu leelù ewu, mùvwàbi byènzeka kale nànsha, mbajimije lusapì! Èyowà, mbamanyè Ciibi, mbamanyè ne Ciibi cìdikù, kàdi cintu cìdì cìlonda n'lusapì bwà kukàngula Ciibi. Mabanji àdi paanyimà pàà Ciibi. Mmakàngilamù, kaayi mwà kumwèka ne mèsù kùdi mwena bupidyà. Kàdi mwena kwitabuujà, udi ne diitabuujà ne udi mwà kwangata lusapì lwà diitabuujà alu, ùdi mwà kukàngula Biibi ebi. Èyowà's, mukalenge.

<sup>70</sup> Musangu kampànda mwab'ewu kùkaadi ndambù wa bidimu, kùvwa mwanèètù mpandanjila, e kuumvwayè ne ùvwa ne dibiikila dyà ku Àfrikè. Ùvwa nsongàalume wa citende; ne mukàjì ne bânà bàbìdì, balenga kumòna èyo, bânà bàà bakàjì batekète, bàà bidimu bitwè ku mwandamutekète anyi mwandamukùlù, ku mwànà. Nènku nsongàalume ewu kavwakù mwà kutàpuluka naaci to. Yèyè ùvwa mwa—mwambi, ùvwa ne èkèleeziyà mwimpe mu ditunga. Kàdi kàvwa ànu mufwànyine kutàpuluka ne dibiikila adi to, ùdi “ne cyà kuya ku Àfrikè.” Ki kusambilayè, muunya ne bufùku. Kavwa muswè kuya to. Kàdi Nzambì e kutungunuka ne kwakula nendè ne: “Udi ne cyà kuya!” Nènku ndekeelu wa byònsò kufikayè mu mùshindù wà ne yèyè, ànu mwangàte dipàngadika, dyà ne, ùdi—ùdi ne cyà kuya!

<sup>71</sup> Pa nàнку e kuyayè kùdì kasumbù kàà mudimu wà bumpàndànjilà kàà èkèleeziyà wendè, ki yèyè kwamba ne: “Nzambì mmumbiikile bwà kuya mu madimi à bwambi mu meetu à kule mu—mu Rhodésie.” Ne mwómò mu diitu emu mmutàpe masaama à maleyaleya, ne mubidi kapyà ne munyà mukolè awu, bipùpu ne nsudì, kàbìdì mwinè mwitu amu mùdi masaamà à mìshindù yònsò, ke mùvwàye mwà kashààla... kushààla matùkù endè wònsò à mwoyi. E kusumbishayè nzùbu wendè ne byònsò bìvwàye naabi. Pa nàнку ke kasumbù kàà mudimu wà bumpàndànjilà kujinga bwà kumuteeta, e kwambabò ne: “Udi wambilamu mpindyewu anyi?”

Yèyè ne: “Ndi mutwishibwe.”

<sup>72</sup> Kumwambilabò ne: “Mukalenge, udikù mwele meeji mu mùshindù ewu anyi, ne udi ne bânà bàà bakàji bàbidi batekète balenga, kàbidi udi ne mu—mukàji mutète mulengele, ne pawikale ànu. . . Mbwà cinyi kwèna mwà kwanji kuya kuntwaku ne kwòsha dísù kumòna mùdibi ne pashiishe kwalukila?”

<sup>73</sup> Yèyè ne: “To, Mukalenge mmungambile. Kaa, ncyà bushùwà menemene!” Yèyè ne: “Mukalenge mmumbiikile. Ne memè ncyèna—ncyèna muswè kushiya lubanza lwànyì to, ncyèna muswè kushiya èkèleeziyà wanyì ne beena kwètù to, kàdi Mukalenge mmumbiikile mu diitù adi.”

<sup>74</sup> Ki yèyè kwamba ne: “Mukalenge, uvwakù mumanyè ne bânà bèèbè bàà bakàji batekète abu bàvwa mwà kukakwàcika disaamà dyà mubidi kapyà anyi disaamà dyà mubidi kapyà wà balùka kanyonga, ne kufwà, kabùyì bwanji kucyà anyi?” Kumutèelelayè bantu bashiilàngàne bàvwa bafwishe bânà bààbò balela, bânà bakesè, bàvwàbo bayè naabò kuntu aku, bafwè bwà màsaamà àvwà kaàyì ne cisàlu nànsha cimwè awu. Bòbò ne: “Elabi meeji tǔng bwà nsudi, bwà mukàjèèbè mulenga ewu ne bânà bèèbè bàà bakàji bàbidi batekète aba bòbò bakwàcike nsudi, ne munya mukolè awu ne bintu byùdi ne cyà kutwilangana naabi.” Bòbò ne: “Kwenakù ne bwòwà, bwà njiwu yà kwangata bânà bèèbè ne mukàjèèbè kuya naabò mu mwaba wà mùshindù awu anyi?”

<sup>75</sup> Ke mpàndanjilà kwimana kuulu mwaba awu, nsongàalùmè wa citende, ke binsòni kubangabi kumupwekela pa matàma, yèyè kukudimuka, kwambaye ne: “Bânà bèètù! Cìkèèna—kumòna cyànyì cyà dibìikidiibwa dyà kùdì Nzambì,” mwàkambaye, “piikalabi ne Nzambì mmumbiikile bwà kuya ku Àfrikè, bânà bàànyì ne dīkù dyànyì bàdi bakùbiibwe bīmpe menemene mu Àfrikè kutàmba mwaba kanà wònsò ewu pa buloba bujima.” Amen. Cìvwa cinyì aci? Ùvwa ne lusapì lwà dibìikila dyèndè, ùvwa ne diitabuujja mu cìvwaye wàmba aci. Kaa, mèmè e kudyàmbidila ne, edi ndiyi dyà bukitù kaayipu edi’s wè! Pangàakadyùmvwà dyàmbedi, mwoyi wànyì e kusàmpukawù. Nwamònu’s ne: “Piikalàbi ne Nzambì mmumbiikile ku Àfrikè, bânà bàànyì munkaci mwà nsudi ne bipùpu ne bikwàbò byònsò, mbatàmbe kukùbiibwa mwòmò amu kupita mu mwaba mukwàbò kanà wònsò panshi pàà buloba apa.” Yèyè ùvwa ne lusapì. Ke cìdì cìkèngela ncyòci aci.

<sup>76</sup> Paùdi ne lusapì, kakwèna bwòwà to, kakwèna mpatà to, kakwèna nkonko to. Kwèna ne cyà kukonka muntu kanà yònsò mukwàbò ewu pa bwalu abu to, udi mumanyè menemene. Udi naalù mu byanza byèbè, udi mumanyè cyà kwenza. Amen. Udi mumanyè cidi cipeta, udi mumanyè ne ciibi necikànguke. Udi mutèète byamù ne mumanyè ne bidi menemene bintu byà bushùwà, ciibi necikùpe e kunzuluka pawàbwejaàmù lusapì.

<sup>77</sup> Kaa, bu èkèleeziyà wikalapù ànu ne nsapì’s wè! Bu

èkèleeziyà wikalapu ne lusapi lwà diitabuuja alu, tuvwa mwà kukàngula ciibi kanà cyònsò, disaama kanà dyònsò, cipùpu kanà cyònsò, bwalu kanà bwònsò bùdiku. Cìvwa mwà kukangudiibwa kutùdì bu twètù mwà kwikala ànu ne lusapi elu. Muntu ewu ùvwa ne lusapi lwà dibiikila dyèndè.

<sup>78</sup> Ntwàlaayikù bwà bujaadiki bwànyì bwà sungasunga. Ndi mvùluka kùkaadi bidimu bitwè ku dikumi ne bitaanu, dikumi ne mwandamutekète mpindyewu, bu nàнку awu, pààkangambila Mukalenge kwìnshì kwà musùlù kwàka, pààkapwekàYe mu Dikunji dyà Kapyà Dyena fòtò unùdì numòna ewu, e kwakulaYè naanyi Wamba ne: “Udi ne cyà kufikisha Mukenji ewu pa buloba bujimà.”

Kàbidì ndi mvùluka ku Green’s Mill pààkaakulàYe naanyi.

<sup>79</sup> Ki mèmè kuya kambila mpaasàtà, ki kungambilayè, wamba ne: “Billy, ncinyi cyùvwa mudyè dilòlò adi? Uvwa mulòtàkane.” Yèyè kwamba ne: “Alùkilà ku mudimu wèbè. Udi wenza mudimu mu Kùmpànyì wa Mbulàmàtadi, udi ne mudimu mwìmpè, alùkila ùkatabàlèèle mudimu wèbè—wèbè, mwanàanyi wa balùme.” Yèyè kwamba ne: “Uvwa mulòtàkane. Uvwa mudyè mupìcishe.” Aci kacyàkalubakajaku mwoyi wànyì nànsha kakesè to!

<sup>80</sup> Pangààkatwàdijà masangisha à babèèdì, bààbùngì bàà kunùdì kaaba aka mbavùlùke Diiyisha dyànyì dyà mu dindà adi dyà: *Mwàkayà Davìdì kakùngamangana ne Ngolijàtà, dingàkayiisha.*

<sup>81</sup> Ki kungambilabò, kwambaye ne: “Mu ditùkù dyà maalu à mamanya à cyena leelù aa edi, patùdì ne lukèbùkebu lwà mshindù yònsò lwà maalu à baamingàngà, patùdì ne bangàngàbukà batàmba bwìmpè, pàkaadi èkèleeziyà mupwè mwoyi ntàntà mule londàpu lwà kwà Nzambì ne bikwàbò byònsò kùkaadi bidimu byàbùngì, byàbùngì menemene, mmunyi muwàyà kumpàla kwà kafyondo wa muntu wa mùshindù awu? Mmunyi muwàpàtuka mumpàla mwà ba-Méthodistes, ba-Baptistes, ba-Presbytériens, ne bikwàbò, nènku nànsha beena Mpenta biinè, bàkaadi bacìpwe mwoyi kùkaadi ntanta mule, ne badibwinke mu twitabàayi yàbò abu? Mmunyi muwàkùngamanganà, kùyi wa dīgumba anyi cintu kampànda cyà kushindàmenapù? Newènzè cinyi Bill?” Mu mùshindù kampànda, anyi kansanga, kacyàkandubakajakù nànsha kakesè, bwalu mvwa mukwatè lusapi mu cyanza cyànyì! Mèmè kwamba. . . Bòbò ne: “Kakwena wakwitabuujakù to. Kwakupeta mùshindù wà kucyènza to. Kakwena wakwitabuujakù to.”

<sup>82</sup> Mèmè kwamba ne: “Kì mbwalu to. Kùdì cintu cìmwèpelè cyà bushùwà; Nzambì mmumbiikile, ne ndi ne cyà kuya bwalu Nzambì mmumbiikile.” Mvwa ne lusapi. Ùvwa mumbikile, Ùvwa mundèje, Ùvwa mungambile, ne ngaakamòna Bwikadi

Bwèndè, pàkantùmàYe ne mudimu wà kwenza, ne lusapì lùvwakù!

<sup>83</sup> Mpaasàtà e kwambayè ne: “Ne dilonga dyà kàlaasa kàà mwandamutekète aku, wamba pèèbè muwàyà kayiisha ne kusambila kumpàla kwà bamfùmù ne bakòòkeshi!”

Mémè ne: “Abi’s bilondèshile Dìyì Dyèndè!”

<sup>84</sup> Mu cikondo bu eci cidimu cyashààdì eci, anyi lumingu lùmwè anyì yìbìdì kumpàla, dìbà dingààkalwà ku èkèleeziyà ewu kunwàmbila ne Mukalenge Nzambi ùvwa mumpèèshè cikèèna-kumòna, cyà kuya mu lwendu lwà bulembi, ne nya—nyama kampànda ùmvwà ne cyà kupeta, uvwa ne cyà kwikala ne nsèngù yà bule bwà byàlà makumi ànaayi ne bìbìdì. Kàdi mu njila pankààvwà mfùma ku dipeta mwinè nyama ewu (mwaba ùvwàyè ne cyà kwikala mulààle, mùshindù ùvwàyè ne cyà kwikala usanganyibwa), mu njila wa dyalukila mwya ne cyà kushipa ours mufìkuluke wa cisengasenga. Ki mémè e kuya ku lusekè kampànda elu, ki mémè kwakula ne muntu kampànda, ki awu kwambayè ne: “Ncyèna mumanyèku nyama kampànda udi mufwànàngane ne awu to. Kàdi bwà ours mufìkuluke, ncitukù mwanji kumumòna kacya.”

Mémè kwamba ne: “Kàdi ùdi ne cyà kwikala mwaba kampànda kaaba aka.”

<sup>85</sup> Pa nàнку kwambaye ne: “Katwèna nànsha tubwela mu citùpà cyà buloba cyà ours to. Tudi munkaci mwà kubàndà batàngile ku mikòòkò, kuulu kumutù ku ndekeelu kwà diitu.” Èè, mémè kuya nendè.

<sup>86</sup> Pààkacyàbo, ànu mu mwaba ùmwèùmwè awu, menemene ànu mwaba ùvwà Mukalenge mwambe awu, ki nyama awu mulààle. Nènku pangààkayà ne kukwata nyama awu, kàdi patùvwà munkaci mwà kuumusha cisèba ne nsèngù ne bikwàbò, abi, yèyè ne: “Ndi muswè nkukonkèku cintu kampànda. Uvwa mungambile, kùkaadi matùkù àsàtù dìbà ditùmùki mu—mu citùùdilu, bwà ne paanyimà pàà wèwè mumanè kwasa nyama kampànda ewu, bwà se mu dyalukila uvwa ne ‘cyà kushipa ours mufìkuluke wa cisengasenga.’”

Mémè kwamba ne: “Aci’s ng’EMU MMÙDÌ MUKALENGE WÀMBA!”

<sup>87</sup> Yèyè ne: “Mémè ncyèna ngèèla mpatà to,” yèyè ne, “bwalu mwanèètù wa balùme ùvwa ùpaluka biseki, ne wèwè kuvwaku mwanji kumumòna kacya bààkulela to, dìbà dyùvwà mwab’ewu musangu kampànda, kàdi wàkangambila ne nsongààlùme awu ùvwa ne cyà kondopiibwa pàmvwà ne cyà kwenza cintu kampànda. Ne wàkondopiibwa.” Yèyè ne: “Mpindyewu, kàdi, Mwanèètù Branham, ndi muswè nkukonkèku,” yèyè ne: “Ndi mwà kumòna kwìnshi kwà mukùnà kwònsò eku too ne ku ndekeelu kwà diitu kwàka, kùdì tubalu twimànyìne aku. Ne kakwèna cintu kuntu kwàka to. Kakwènakù kajèngù kàà

mashindè, kakwèna lubwebwe, kakwèna cintu nànsha cimwè to.” Cisuku cyà kashà kàà nsèngù yà mpàndà, cyà bule bwà byàlà bìbìdì, dyàmwàmwà dyà mikàlù yà diitu, mu kilòmèètà umwe ne citùpà anyi bisambùke ku mutù kwà ndekeelu wa diitu kwaka. Yèyè ne: “Ours neikalè penyì?”

<sup>88</sup> Mémè ne: “Nzambì ùdi Yèhowàh–yilè. Pìikalà Ye mungambile ne nekwikale ours kuntu kwàka, neikalèku.”

<sup>89</sup> Patùvwà twenda tupweka mukùnà awu, dîbà dyònsò ditùvwà twenza ntàntà wipacila kilòmèètà bu nàнку awu, twenda tutàmba kusemena, ùvwa wàmba ne: “Mwanèètù Branham, dîba edi’s bìkèngela bwà ours awu kumwènekayè.”

Mémè ne: “Kùtàcishi meeji to, yèyè neikalè kaaba aka.”

<sup>90</sup> Kàdi patùkaavwà mu ntàntà wipacila ku mètres nkàmà yinaayi ne makumi ataanu ne mwaba ùvwà tubalu túsanganyibwa, tuvwa ne cyà kwikisha kàbìdì bwà bujitu bwà nsèngù ne bikwàbò bintu bitùvwà bambùle paanyimà. E kukènzàkanayè cyàkàbìdì, ke mémè kutàngila mu mpàla mwèndè pàvwàye muntàngile, byenze bu ne mu mwoyi wèndè ùvwa munkaci mwà kudìkonka. Nwamònu’s, ùvwa *mutèkèmène* ne ùvwa mufwànyine kwikala mwaba awu, kàdi yèyè kàvwa ne lusapì to.

<sup>91</sup> Kàdi mu mùshindù kampànda, ku ngàsà wa Nzambì, Yèyè kacya kàtukù mwanji kumpangisha to. PààkangambilàYe ne nekwikale wa cisengasenga mufìikuluke kuntu kwàka, mwawa ne lusapì. Ncyàkacyèlakù mpatà nànsha mikesè, nànsha kakesè. Mémè kumutàngila, kwamba ne: “Bud, neyikalèku.” Nènku ndi mwenze ànu nkùdimuka anyi, ki ours ewu pwàà [Katùpà kàà mukàbà wa mèyi munda mutupù–Muf.] mwimàne ànu ku mutù kwètù eku mu ntàntà wa mètres nkàmà mwadamukùlù.

<sup>92</sup> E kwasayè tulondo kwìsù, kwambaye ne: “Billy, ngwambilamu, ng’ours munène wa cisengasenga’s!”

<sup>93</sup> Nwamònu’s, lusapì, cikèènà–kumòna, Dîyi dyà Mukalenge, kakwèna cintu nànsha cimwè cidì mwà kuDishintulula anyi kuDii manyika to. Cidì èkèleeziyà naaci dijinga dilòòlò edi kí ndilonga dyà tulaasà to. Cidì èkèleeziyà naaci dijinga dilòòlò edi kí ndingumba to. Cidì èkèleeziyà naaci dijinga dilòòlò edi ki ntwitabàayi to. Cidì èkèleeziyà naaci dijinga dilòòlò edi n’lusapì lwà Mifundù, Ciibi aci. Bwalu, Kilistò ki Ciibi, ne Yèyè ùdi Dîyi. Diitabuuja mu Dîyi dyà Nzambì udi ne mwoyi didi dikàngula ciibi cyònsò.

Nzambì, tùpèèshèku lusapì alu. Tùpèèshèku lusapì alu.

<sup>94</sup> Ebèlù, nshapità wa 12, ùdi wàmba ne: “Bu mùdibi ne tudi banyùngulukila kùdì ditutu dinène dyà bantèmù, tuteekàayi bujitu bwònsò ku luseke, ne bupidyà bìdì bitàmbe kutùnyungulukila mu mùshindù mupepèlè menemene.” Ùdi wàmba ne “mpèkaatù,” mbwena kwamba ne, *mpèkaatù* ùdi

“bupidyà.” Nwamònu anyi? Kùdi mpèkaatù ànu umwèpelè, mbupidyà.

<sup>95</sup> Kàbìdì *mpèkaatù* mbwena kwamba ne: “kupangila kiipàcìlà.” Mbyenze bu paùdì ukùma cingoma, upangila bwà kwasa cyùdì muludikile, mbitàmbe bwîmpè bwà kululamija cingoma cyèbè, nwamònu’s, bwalu kùdì cintu kampànda cìdì kacyì mu cyòcì nànsha. Uvwa mupangile kiipàcìlà. Wamònu’s, alùkìlà uteetè cyàkàbìdì. Nwamònu anyi? Mbwena kwamba ne kukùdimuka, udi mupangile kiipàcìlà. Pawùdì muswè kwikala mwena Kilisto, kàdi uya ukashààla wa mu èkèleeziyà, udi mupangile kipàcìlà. Paùdì muswè kwikala mwena Kilistò, ne wèwè kwikala mummyaminyìbwe màyi mu dìnà dyà “Taatù, Mwànà, Nyumà Mwîmpè,” uvwa mupangile kiipàcìlà. Mbitàmbishe bwîmpe wèwè kwalukila. Kwàkufika pa kiipàcìlà to. Newùye kule, mbwà bushùwà menemene. Kùdi Cintu ànu cìmwèpelè cìdì mwà kukulama mu mulongo mupwàngàne, ki Mifùndù, Bible, Dìyi. Bwalu, maulu ne buloba byònsò bibidì nebijimine, kàdi Dìyi dyà Nzambì kadyàdyàkujiminaku nànsha.

<sup>96</sup> Pa nànkù, lamàayi lusapì, diitabuuja mu Dìyi! Ne katùpà kwònsò kàà diitabuuja kaùdì witabuuja, ne kùyiikù wèla mpatà nànsha mikesè to, udi mwà kukangula ciibi cyònsò cìdì cimàne pankaci pèèbè ne dibènesha dìdì Nzambì naadi bwèbè wèwè. Nzambì àtùkwacisheku bwà twètù kwikala ne nsapì, ki disambila dyànyì ndyòdì adì. Twinyikaayi mitù yetù mpindyewu bwà mwàkù wà disambila.

<sup>97</sup> Taatù wetù wa mu Dyulu, tudi tuKwela twasàkidila dilòlò edi bwalu Wèwè udi mutùpèèshe lusapì bwà kutùkàngwila lupàndù. Ndi—ndi nKwela twasàkidila bwà cyòcì aci, Mukalenge, bwà mutùdì basùngidiibwe, ne bwà lusapì lutùwà bakùmbàne bwà kukwàta naalù mudimu mu ntàntà yònsò ewu. Kàdi Nzambì tupèèsheku diitabuuja, bwà dyònsò dyà ku Méyi àdì mafùnda mu Mukàndà Wèbè dìdì tubyamù tukesè, ne Nsapì eyi yìdì yìbìikidiibwa ne Yesù. . . Ciibi eci, mùndì njinga kwamba, cìdì cibìikidiibwa ne Yesù; ne lusapì, lùdì lùbìikidiiba ne diitabuuja, lùdì lùlenga Dìyi dyònsò, lùdì lùdikangula. Lùdì lùpwekesha kacayamù kakesè aku panshi bwà twàmòna mwà kubwela mu dibènesha adì. Taatù wa mu Dyulu, tìpèèshèku nsapì, bwà twamònakù mwà kwikala bakùmbàne bwà kwikala ne diitabuuja mu milayi yà Nzambì, bwà diitabuuja dyètù kadipangidiku to, bwà twàfwànyina kwikala bakùmbàne bwà kwikala ku mudimu bwèbè Wèwè ne bwà aba batùdì tukwàta naabò mudimu pàmwè.

<sup>98</sup> Tujìmìjilaku mpètaatù yònsò wa bupidyà bwètù, Mukalenge, ne ùtwambulwisheku bwà kwikala Bèèbè. Tudi tulwa mpindyewu ku mèèsà à Mukalenge, ne ndi ndòmba, Taatù wa mu Dyulu, bwà Wèwè kutufwilakù luse ku matomboka ètù ónsò, bwà twamònakù mwà kwikala bakùmbàne bwà kubwela

mu disànkà dyà bwobùmwè mu nyùngulukilu wa mèèsà à Nzambi. Tudi tulòmba nùnkù mu Dinà dyà Yesù. Amen.

<sup>99</sup> Mwanèètù wa balùme, mwanèètù wa bakàjì, pawikala ne lusapì lwà Bukalenge, lusapì lwà Ciibi, lusapì lwà lupàndu, Nzambi àkwambùlwishekù bwà kukàngula biibi ne kulekela Yesù àbwelè. MuLekèlè àkupèèshè byùdi utàmba—utàmba kujinga.

<sup>100</sup> Mpindyewu, ànu katanci kakesè cyanààna kumpàla kwà twètù kubanga kubala pa mèèsà à Mukalenge, ndi muswè kwamba cintu kampànda bwalu cidi pa mèèsà à Mukalenge. Nènku patwàfikà ku cyoshelu eci, kùdi mùshindù ànu wùmwèpelè wa kulwa, mbwena kwamba ne, twètù bakwàte lusapì lwà diitabuuja mu byanza byètù, bwà kutùmanyisha ne mpèkaatù yètù mmifwidìibwe luse. Kàdi twètù katùyì ne nsapì ayi bwà kukàngula Ciibi aci, bwà ne mpèkaatù yètù mmifwidìibwe luse to, katwèna ne cyà kulwa ku mèèsà à Mukalenge to. Bwalu, ewu udi udyà ne unwà kàyì mukùmbànyine to, ùdi ùdya ne ùnwa dipiila bwèndè yèyè mwinè, pàdiye kàyì ùjingulula mubidi wà Mukalenge to. Mpindyewu, aci ncilelèlà.

<sup>101</sup> Ngeela meeji ne bònso bwètù tudi bamanyè ne leelù Nditùkù dyà mèèsà à Mukalenge bwà Ditùnga dijimà. Leelù nditùkù didi maèkèleeziyà ónsò àngata mèèsà à Mukalenge. Nditùkù dyà mèèsà à Mukalenge bwà Ditùnga dijimà. Kàdi mwva ngèela meeji ne bìwva bifwànyine kwikala bikùmbàne bwà kwakulakù díyì dimwè anyì àbidi pa mèèsà à Mukalenge kumpàla kwà twètù kuàngata, pàdi mpaasàtà, bu yèyè mwà kuswà, wènda wàkaja Mifùndu bwà dibala dyà—bulongame bwà mèèsà à Mukalenge. Mpindyewu, mèèsà à Mukalenge aa . . . Mpindyewu, nengàngate ànu tusunsa tutwè ku dikùmi cyanààna.

<sup>102</sup> Mèèsà à Mukalenge atùdi tudilongolola bwà kwangata aa, àvwa cyena bwalu citàmbe bunène mu dilongesha kanà dyónso dyà mu Bible. Aci civwa dyàbò . . . dimwè dyà ku makokangana à kumpàla mu èkèleeziyà wa ku cibangidilu. Nènku leelù ewu beena Mishònyì, bàà ba-Épiscopalians ne ba-Méthodistes, ne bààbùngì bàà ku maèkèleeziyà à Mishònyì, àvwa mafwànyine kwitaba ne disànkà dyónso dilongesha dyà Kàtòlikè, dyà Kàtòlikè kàà cyena Loomò, bu bóbò mwà kucimuna cipumbishi cikesè cyà mèèsà à Mukalenge eci. Kàdi nebiitabè bwà bansaserdòsè kusèlabò ne kwikalabò bambi, èkèleeziyà wa Kàtòlikè mbapètàngàne misangu yàbùngì mu bisangilu byàbò ne masangisha. Mbapètàngàne pa cyòci eci. Ne nebàpetanganè pa masambila mashìilàngàne, ne bikwàbò, èkèleeziyà wa Mishònyì neàpetanganè pa cyòci eci. Ne tutèshisùmù ne bikwàbò byónso, kaacyoshilu kakesè apa ne pààpa, ne èkèleeziyà wa Kàtòlikè mmuswè kucyènza. Kàdi padibi bikafika ku mèèsà à Mukalenge, ke mwaba ùdibo badishìndile ngwòwò awu. Muntu kanà yónso ewu ukàadi mubaleku maalu-malonda mmumanyè cyòci aci.

Kàdi, mu bushùwà bwà bwalu, bilondèshile wànyì ngeelèlù wa meeji, bàdi ne cyà kwikala buumùke ku byàbúngì, kumpàla kwà mêmè—mêmè kuciitaba, nudi numòna's, bwalu kí m'Bible to.

<sup>103</sup> Kàdi ndi muswè bwà wéwè kwambila èkèleeziyà wa Kàtòlikè cintu cìmwèpelè. Nudi bamanyè èkèleeziyà wa Kàtòlikè, ku cibangidilu, ùwà èkèleeziyà wa mpenta wa cìpostòlò anyì? Ncyà bushùwà ki civwàye! Civwa ntwàdijilu wa nzànzànzà wa èkèleeziyà. Nudi numòna mwaba ùdìbo—mwaba ùdìbo bakafikè, mbadìbwinke mu kuumusha kwà Dìyì ne kufunyika kwà bilèlà.

<sup>104</sup> Kàdi bu èkèleeziyà wa Mpenta mwà kushàalakù ne mwoyi munda mwà bidimu bikwàbò lukàmà, mmufwànyine kwikala mulalùke kule menemene ne Bible kupìta mùdi èkèleeziyà wa Kàtòlikè leelù emu, bwà mùshindù ùdiye wènda ùya mpindyewu ewu.

<sup>105</sup> Byàkangata èkèleeziyà wa Kàtòlikè nkàmà, ne nkàma yà bidimu bwà kuKuumuka, bidimu nkàmà yìsàtù, kuumukila ku èkèleeziyà wa ku cibangidilu too ne ku bulongolodi bwà èkèleeziyà wa Kàtòlikè wa cyena Loomò, wàkatwàdijabò awu. Nènkù bàkapeta, mu dibweja dyà bantu banène bàà luumù ne bintu cyakaa, ki bóbò kukòsa *eci* ne kubwejabò *eci*, ne kupàtulabò *eci* e kubàndishabò *cyàcyà*, kutònkolabò mpìngù yà cimpàngaanù, kubàndisha mpìngù yà bwena Kilistò, ne bikwàbò byònsò, ne bènda bàdya cibànga pa Cyòci aci too ne mwàlubù kufika ku cikaadibò naaci mpindyewu ewu *eci*, èkèleeziyà wa Kàtòlikè kàà cyena Loomò.

<sup>106</sup> Nènkù èkèleeziyà wa Mishòònyì yà cyena Mpenta kuumukila ku—bidimu makumi àtaanu byà kacya wikalakù, ne mwaba ùdiye mukulùkile muumuke pàakabangilayè, nebitambè kwikala bibi menemene kupìta èkèleeziyà wa Kàtòlikè, mu bidimu lukàmà kumpàla eku kuumukila ku mpindyewu. Aci's ncyà bushùwà. Aci's ndiyi dinène dyà kwamba, kàdi òmwènaayi mwaba ùdìbo bafùmìne ne cibulà cyàbò. Bàakabwela buludì mu bulongolodi, bàakabwela buludì mu kudyà cibànga pa *eci* ne pa *cyàcyà*, ne bikwàbò byònsò. Nènkù ki bóbò bàyaaya bàba, nwamònu's, bàalukila buludì cyànyimà.

<sup>107</sup> Kàdi, *mèèsà a Mukalenge*, mmabiikidiibwe ne “didya dyà dilòlò dyà Mukalenge.” Mpindyewu, bantu bàabúngì, mbaswè kuàngata mu dindà. Ki mbàmbe mu Bible ne civwa cyàkudyà Cyèndè *cyà mu dindà to*. Kàdi mmunyi mùdi bantu aba leelù ewu, mmunyi mùdìbo mwà kutùngunuka ne kwamba ne: “didya dyà dilòlò dyà Mukalenge,” kàdi kabàyi bàdyènza to. Mbakòsa *didya dyà dilòlò*, ne badyumushe, ne badìbùkile ne “didya dyà mundaamuunya,” macimbu's wè. Didya dyà dilòlò!

<sup>108</sup> Mpindyewu, civwa misangu yònsò ànu dikòkangana mu bikondo byà Bible, civwa dikòkangana mu matùkù awu. Bantu bàwà bùmwa bibi didya dyà dilòlò dyà Mukalenge. Pàvwàbò bàlwa ku mèèsà, mwàkambila Pòlò beena Kolintò abu, bàwà



bàlwa ne bàkwàcika mvinyò ku mèèsà à Mukalenga. Nwamònu's, cìvwa cyumvwa bibi ànu kwònsò aku. Yèyè ne: "Wèwè muswè kudyà, dyàku kumbèlu."

<sup>109</sup> Ne cintu cikwàbò ncyà ne, cìvwa cyumvwa bibi, mu dyumvwija dyàci. Bangenzàmpèkààtù, ne muntu udi muvwàngàle mu mpèkàatù, ùvwa ùlwa ne wàngata mèèsà à Mukalenge. Nènku cyôci aci cìvwa cyumvwa bibi. Muntu wètù ewu musòmbe ne mamwëndè, ne mukàji wa tatwëndè ne èkèleeziyà mumwambile bwalu abu; mwikale ànu wàngata nkòomunyò ku mèèsà.

<sup>110</sup> Kàbìdì kùvwa matàpuluka munkaci mwàbò, cikòlà biikale ànu bàngata mèèsà à Mukalenga. Kwambayè ne: "Ngùmùvù ne nudi nwenda bu bàà Bisàmbà byà bendè bònsò. Kàbìdì kùdì—kùdì mapiyakana munkaci mwènù, bu mùdìwu kùdì—ku nzùbu wa Kefà nangànangà, ne bikwàbò." Yèyè ne: "Nwènù nudi nwenda ànu bu bàà Bisàmbà byà bendè bònsò." Nwamònu's, cìvwa cyumvwibwe bibi.

<sup>111</sup> Mèèsà à Mukalenge àtu ànu mumvwibwè bibi misangu yònsò. Mpindyewu, ndi mwà kwakulàpu munda mwà mèbà àbùngì, kàdi tudi ne cyà kupita ku mèèsà à Mukalenge aa ne ku dyoweshangana dyà màyi ku makàsà. Bwa dyoweshangana dyà màyi ku makàsà kaayi bakaadi badilekela bijikila, pa kuumusha ànu màngumba ndambù. Beena Mpenta bààbùngì mbumuke buumukilemù ku cyôci aci. Nwamònu anyi? Ne cìcidi ànu mu Bible ànu mùshindù wùvwàbi bifùnda awu. Nwamònu anyi?

<sup>112</sup> Mpindyewu, Loomò keena ucìbìikila ne "mmèèsà à Mukalenge to." Bàdi bàcìbìikila ne "misà, mmisà munsanto." Kabàtu bàngata mèèsà à Mukalenge to, bàtu bàngata misà. Mmisà, kàdi misà mu bushùwà bwà bwalu misà yidi yùmusha dyumwija dilelèlè dyà mèèsà à Mukalenge. *Misà* mbwena kwamba ne "kutèkemena." Bàdi bàngata misà, bàtèkemena (bwà se mu kwenza cyôci eci mu misà) Nzambi neàbàjìmiijile mpèkàatù yààbò, mu kwàngata kwa "mubidi mwena dinà wà Kilistò, ùdì nsaserdòsè ùkùdimuna mu Mubidi ne Mashi byà Kilistò," bàngata cyôci aci, bàtèkemena ne Nzambi neùmushè mpèkàatù yààbò mu kwenza kwà cyôci aci. Ke misà nyòyi ayi.

<sup>113</sup> Beena Mishòònyì bàdi bàcìbìikila ne "nkòomunyò." Nkòomunyò mbwena kwamba ne "disàkidila." Abu ke beena Mishòònyì. . . Beena Kàtòlikè bàdi bàngata misà, mu misà amu bàdi bàtèkemena ne Nzambi ùdi ubàfwila luse ku bubì bùvwàbò bènze. Beena Mishòònyì bàdi bààngata ne kusàkidila bwà cìkaadi cimana kwenza ne mu bwobùmwe ne Nzambi; bàbwela Nendè mu bwobùmwe, bwà se cìkaadi cimana kwenza. Beena Kàtòlikè bàdi bàtèkemena ne cyenjìibwe; beena Mishòònyì bàdi bàmba ne cìkaadi cimana kwenza. Mwena Kàtòlikè ùdi ùdikonka ne mpèkàatù yendè ní mifwidìibwe luse; mwena Mishòònyì yèyè ùdi ùjikula ne mifwidìibwe luse, wamba

ne mmudiikàdile. Nènku mèèsà à Mukalenga nkubwela mu bwobùmwè ne Nzambi. Kàdi bintu bitùdi twangata ebi, kî mmu *ditèkèmena* ne mpèkaatù yètù mmifwidiiḅwe luse to, kàdi *yidi* mifwidiiḅwe luse. Bwalu bùdi ne... Umwe nditèkèmena; ne mukwàbò ndiitabuuja. Ewu ùdi ùtèkèmena ne mmubîngè; ne mukwàbò pèndè mmumanyè ne mmubîngè. Nwamònu anyi? Mukwàbò ewu, ewu ùdi ùtèkèmena, bwalu kî mmumanyè pàdiye mwimànyine to; mukwàbò mmumanyè ne yèyè mmubîngè, bwalu yèyè mmumanyè cidi Nzambi mwàmbe. Kî cyôci aci. Kî dishiilàngana ndyôdi adi. Pa nàнку, pawikalà ànu utèkèmena cyanààna, wadimuka; kàdi pawùdi mumanyè, díbà adi tungunuka. Nwamònu's, díbà adi udi mu bwobùmwè ne Nzambi. Mwena Mishòonyi yèyè, ùdi wàmba ne mufwidiiḅwe luse ne mmucimanyè; mwena Kàtòlikè yèyè ùdi ne misà, ùtèkèmena ne neàfwidiḅwè luse. Ncyenze ànu bu eci nùku: ewu mmulòmbi wa kàà pa luse, ùtèkèmena ne byònsò mbîmpe, nwamònu's; mukwàbò yèyè mmulòmbi wa kàà pa luse ùsàkidila bwà cikaadi cimana kwenza. Bònsò bwàbò mbalòmbi bàà kàà pa luse. Kàdi mukwàbò ùdi ùlòmba, mutèkèmene ne neàcipetè; mukwàbò mulòmbi wa kàà pa luse ewu yèyè mmumanyè ne ùkaadi naaci, ne muMusàkidile mùdiYe mumupèci. Mpindyewu, ke dishiilàngana ndyôdi adi. Ke bwobùmwè mbwòbò abu. Èyowà's, mukalenge. Ewu mmutèkèmene ne mmufwidiiḅwe luse; mukwàbò yèyè mmumanyè ne mmufwidiiḅwe luse, mwikàle ùsàkidila bwà cyôci aci.

<sup>114</sup> Pa nàнку, nkòòmunityò ùdi bwà beena Kilistò bàdi balediiḅwe cyàkàbìdi ku Nyumà wa Nzambi. Ne *mulediiḅwe cyàkàbìdi* kabyèna biswa kwamba ànu menemene mpindyewu ne udi ne Nyumà Mwímpe nànsha. Mpindyewu nwàvùlukaayi. Mpindyewu, bààbùngi bàdi bàlongesha aci. “Ncyèna mumanyè muntu udi ucilongesha mùshindù ewu to,” bu mwàkambà Mwanèètù mukùlumpè Arganbright dilòlò adi ku cyambilu eku, nwamònu's. Kàdi, dilediḅwa dipyadìpyà kî ndibàtiiza dyà Nyumà Mwímpè to. Mifùndu kayèna yicítwa nyama ku mìkòlò to, ncyèna ngèèla meeji nàнку to, nwamònu's, mu wànyì mùshindù wà kucimòna. Nwamònu anyi? Ndi ngiitabuuja ne nudi balediiḅwe cyàkàbìdi . . .

<sup>115</sup> Nènku kî bwà cinyi ndi ngenza mudimu ne dibatiiza dyà mu Dìna dyà Yesù Kilistò, kadi kabiyi bwà difùkuludiḅwa to. Mpindyewu, wa beena Mpenta, èkèleeziyà Musanga wa beena Mpenta, ùdi ùbàtiiza mu Dìna dyà Yesù Kilistò bwà difùkuludiḅwa. Mémè ncyèna ngiitabuuja aci to. Ne bòbò bàdi mwà kucyènza bu bòbò baswè. Kàdi ndi ngiitabuuja ne Peetèlò wàkamba ne: “Nyingàlalaayi,” dyàmbedi. Màyi kaèna àjimija mpèkaatù to. Èkèleeziyà wa Kilistò ùdi ùciyiisha mùshindù awu. Kàdi ndi ngiitabuuja ne kanyinganyinga, ndibungama dyà difwànà dyà Nzambi; *kuningalala* mbwena kwamba ne “kukùdimuka, kwalukila,” uvwa mupangile kiipacilà,

“bangùlùlà kàbìdì.” Enza aci dyàmbedi! Kàdi dibàtiiza dyèbè dyà mu màyi ndijikula dyà pambèlu dyà ne cintu kampànda ncyenzèke munda mwèbè amu, bwà ne udi mwitàbe Kilistò bu Musùngidi webè.

116 Ndi ncinka ne tudi ànu èkèleeziyà ewu dilòlò edi, ku dyànyi dimanya, mèmè ncyènà mwab’ewu misangu búngì bukùmbàne bwà kutàmba kumanya ne nganyì utu ulwa menemene ne nganyì utu kàyì ùlwa to. Mvwa ne didyula dikesè mwab’ewu matùkù mashàale aa pa dibàtiiza muntu mu ciina cyà màyi, muntu mununu. Ki mèmè kuya kùdiye, ùvwa muntu mununu mwímpè. Mvwa mupetè dyèsè dyà kulombola díkù dyèndè dyònsò kùdi Kilistò, bònsò bwàbò mbeena Kilistò. Muntu mununu ewu ùvwa muntu mununu wa maalu malenga, nènku mvwa mumuswè, ki mèmè kuya kùdiye e kumwambila ne: “Papa, bwà cinyì kwèna ulwa mwena Kilistò?” Yèyè ùtu munnange.

117 Yèyè ne: “Mwanèètù Branham, ndi mufwànyine kulwa mwena Kilistò pàndì mwà kulwa mwímpè bikùmbàne.”

118 Mèmè kwamba ne: “Ndi nkwambila cyà wèwè kwenza, Papa. Kènzakanà too ne muwàpetà mwaba údi mwà kulwila mwímpè bikùmbàne, pashìishe ungambile ne mpenyi apu, ndi muswè kuya, pàànyi.” Mèmè ne: “Kilistò kàakalwa bwà kusùngila muntu mwímpè to. Wàkalwa bwà kusùngila muntu mubi.” Paùdi wela meeji ne udi mwímpè, díbà adi Yèyè kàvwa mulwè bwà kukusùngila to. Wàkalwa bwà kusùngila aba bàdiYe Yèyè mumanyè ne mbabi. Nwamònu anyi? Kilistò wàkafwà bwà kusùngila bangènzàmpèkààtù. Nwamònu anyi? Ki mèmè ne: “Papa, kùdi mushoonyi kaaba aka mene.”

Yèyè kwamba ne: “Èè, nyewu ànu nwa mfwankà eyi.”

Mèmè ne: “Ncyàkwakula nànsha bwàyì to.”

Yèyè ne: “Ndi muteetè bwà kuyilekela, Mwanèètù Branham.”

Mèmè ne: “Èyo, katwàkuyiikilangana bwà mfwankà to.”

Yèyè ne: “Èè, pàndì mwà . . .”

119 Mèmè kwamba ne: “Kwàkudi—kwàkudi kàbìdì bwàyì to, yilekele cyanàànà. Ndi muswè nkwelèku lukonko.”

Yèyè ne: “Èyo, lùdi bìshi?”

Mèmè ne: “Udi witabuuja ne kùdi Nzambì anyi?”

120 Yèyè ne: “Cyà bushùwà, ndi nciitabuuja.” Yèyè ne: “Ndi ngiitabuuja ne mwànyi mwònsò bu wèwè, ngèèla meeji, Mwanèètù Branham.”

121 Mèmè ne: “Udi witabuuja ne Nzambì umwèumwè awu wàkuumuka ku civwaYe ne wàkavwijibwa mubidi ne wàkasòmbela munkaci mwètù mu mupersona wà Yesù Kilistò, bwà kusùngila muntu anyi?”

Yèyè ne: “Èyowà, ndi ngiitabuuja nànkù.”

“Ne wàkafwà bwà kusùngila bangènzàmpèkààtù bu mùdi amu ne bu mèmè ewu anyi?” Nwamònu anyi?

“Èyowà, ndi ngiitabuuja nànkù.”

<sup>122</sup> Mèmè ne: “Mpindyewu, bìdi anu mùshindù ewu. Tudi bònso mu nzùbu umwe munènè kaaba aka, ne tudi mu bùlokò, nènkù ncyèná mwà kwimana mu ditumba edi kàdi kwamba ne ‘eci necingambùlwishe bwà mèmè kupàtuka mu bùlokò emu,’ Ngii manyina mu dyàdya ditumba ngàmba ne ‘cyàcya necingambùlwishe bwà kupàtuka mu bùlokò mwàmwa,’ tudi ànu mu lutàtu lùmwè. Ne muntu yònsò uvwa mulediibwe pa buloba ebu wàkalediibwa mu mpèkaatù, mufwimba mu bubì, mulwe pa buloba mwikàle wàkùla mashimi. Mmuntu mupidyè diitaba, cyà kumpàla.”

<sup>123</sup> Muntu kampànda wàkakonka ditùkù adi, wàmba ne: “Mwanèètù Branham, bu...nkufwànyinekù kwikala dishiilangana pankaci pàà Adàmà ne Evà, ne bânà bààbò balela leelù ewu anyi, bu ne bàvwa bònso butakà, bènda bènda mu... Mibidi yààbò yìvwa—yìvwa mifwànyine kwikala mùmwè anyi?”

<sup>124</sup> Mèmè kwamba ne: “To, mukalenge.” Tuvwa twalukila kumbèlu tufùmina ku dilemba dyà nshindì, Mwanèètù Fred ne mèmè, ne musumbà wa bóbò abu. Mèmè kwamba ne: “To, kayìvwa mifwànyine kwikala mùmwè to.”

<sup>125</sup> Yèyè ne: “Udi uswa kwamba ne Evà kàvwa mufwànyine kwikala mukàji bu bânà bèndè bàà bakàji to, ne Adàmà kàvwa mufwànyine kwikala muntu bu bânà bèndè bàà balùme anyi?”

Mèmè ne: “Mu byàbùngì, kàdi kì mmu byònsò byà mubidi to.”

Ki kwambàye ne: “Dishiilangana òvwa mwà kwikala ku cinyi?”

<sup>126</sup> Mèmè kwamba ne: “Kabàvwa mwà kwikala ne mùfù nànsha. Bàvwa bafùkiibwe. Mmwòmò. Kabàvwa balamakana ku cintu nànsha cìmwè to.”

<sup>127</sup> Pàdi ànu cintu aci cyashiibwe pa cintu cyònsò cidi cilediibwe pa buloba apa, cidi cileeja ne ncipidyè diitabuuja, twamb'eku twamb'eku. Ncyà bushùwà. Mèmè ne: “Bushùwà, kudi dishiilangana. Kabàvwa mwà kwikala ne mùfù nànsha. Kabàvwa balamakaja kùdi mukàji nànsha, bwà kulwa pànwàpa.” Nwamònu's, Nzambi ngwàkabàfùka.

<sup>128</sup> Mpindyewu, mèmè kwamba ne: “Ndi muswè kwamba cintu kampànda. Muntu yònsò mu nzùbu wa buloko ewu, udi wa cijila nganyi? Nganyi uvwa kàyi mulela ku disangila dyà mulùme ne mukàji? Nganyi udi mwà kwambulwisha mukwàbò, nànsha bàmwamba ne nganyi? Twètù bònso tudi mu bùlokò bùmwebùmwe ebu. Kàdi Nzambi wàkadyenza Yèyè mwinè cìmwè cyà ku bifùkiibwa Byèndè e kuseesuka Yè disangila dyà mulùme ne mukàji, kupicila ku Mashi àà cijila àkafukà Yè Yèyè

Mwinè, ne ku Mashi awu Yèyè kutùpikula.” Mémè ne: “Udi witabuuja aci anyi, Papa?”

Yèyè ne: “Ndi ngiitabuuja nànkù.”

129 Mémè kwamba ne: “Kilistò wàkafwà bwà muntu mubi bu wèwè. Mpindyewu, kùdi mùshindù ànu wùmwpelè wa kwenza. Kakwèna cintu nànsha cìmwè cyùdi wèwè mwà kwenza to. Wàkakupèshaci. Kwèna mwà kucikùmbànyina to. Kwèna ne cyùdi mwà kwenza bwà wèwè kucipeta nànsha. Yèyè mmukupèeshaci ànu cyanààna. Udiku mwà kwitaba cidiYe mwênze bwèbè wèwè, bwà kukwepula ku iferno anyi?”

130 Kwambayè ne: “Nengènzè nànkù.” Yèyè ne: “Kadi bu mémè mwà kutàpulukaku ne mfwankà eyi.”

131 Mémè kwamba ne: “Mfwankà neyidyumukile nkààyaayi. Wèwè enza ànu . . . ncyèna nkulombà to. Mémè ncyèna mwena ne ànu mikenji to. Ndi ngiitabuuja ngàsà. ‘Ne bônso bàdi Taatù muMpèeshe nebàlwe kùNdi.’” Mémè ne: “Wèwè mwiitabùùje aci ne mwoyi wèbè wónsò!”

Yèyè ne: “Ne mwoyi wànyì wónsò, ndi nciitabuuja.”

132 “Dìbà adi neucitàbè pa bishimikidi abi, bwà ne kwèna mucikùmbànyine to, kadi Yèyè ke Udi mukùmbànyine anyi? Kuditangidi wèwè mwinè nànsha; mutàngile Yèyè, bwalu kwèna mwà kwenza cintu nànsha cìmwè mu wèwè mwinè to. Tàngilà kùdi Ewu wàkenza cintu kampànda bwèbè wèwè; Udi wamba bishi Bwèndè?”

“Kaa,” mwàkambàye, “Yèyè’s mmukùmbànyine.”

Mémè ne: “Ki cyôci aci, dìbà adi itàbà cidiYe ùkupèesha aci.”

Yèyè ne: “Ndi ngiitaba.”

133 Ne ngàkamubàtiiza mu Dìna dyà Yesù Kilistò. Dyà ùpàtuka mwab’ewu anyi ùmba ùteemesha mucì wà mfwankà.

134 Mbingu mikesè mishààle eyi mvwa kwèndè kumbèlu. Mémè kumòna cìkèèna-kumòna dilòlò kampànda, cyà mucì mubishi mutapa mutonkwela panshi, mukùvùmika. Mémè kumòna mabaya mapoopelaku ne misonso. Ànu ku dibaya dyà ndekeelu aku kùvwa dibaya dyà pabwàdi. Kadi mwinshi mwà dyòdi dibaya adi, lwà kwinsi ku ndekeelu aku, kùvwa kushikile mùshindù ewu, mucì ùvwa mucibùkile ànu mwinè mwaba awu. Ke Dìyi kwambadi ne: “S’ùvwa mwà kwikala wèwè,” anyi, “Ùvwa mufwànyine kwikala wèwè.” Kadi Papa Cox wàkakùluka, muzajike mongo wèndè *mwab’ewu*. Nènkù ewu mu dindà dyàkalonda e kumutwàdilabò mfwankà yèndè ayi pàvwàye mu bulàlu, nyòota yikaavwa mimane kumushiya. Mbingu mishààle paanyimà! Katukù mwànji kulabula nànsha umwe, kènà nànsha muswè nànsha umwe anyi cingà cintu to. Nwamònu anyi? Nènkù ngàakamumòna kùkaadi katanci, pàvwà byanza byèndè bikùnzùbile byònsò, kùkaadi ndambù wa mbingu, ne mfwankà, kadi mpindyewu kènà mwà kwitaba

nànsha bwà mfwankà kwikalayè pabwîpì nendè to. Tèèkaayi bintu byà kumpàla kumpàla! Kuteeci bwà kwikala mwîmpè to; udi mubì, ànu kwìnè kwònsò aku, ne kwèna ne cyûdì mwà kwenza nànsha. Kùdi mulongo wa ditàpulula, ne bantu bònsò bàdi ku luseke lwàlwa.

<sup>135</sup> Mpindyewu, pâmvwà mulediibwe pa buloba ebu, cìvwa pankacì pàà nsòmbelu wa cijila wa dibàkà, pankacì pàà taatù wanyì ne maamù; mu difù dyèndè mùvwa diyì, mu mifungù yà taatù wanyì mùvwa kabùlù kàà mashi. Mwoyi wànyì mmwenza kùdi kabùlù kàà mashi aku (ki n'ku diyì dyà maamù wanyì to), kùdi kabùlù kàà mashi kàà taatù wanyì. Kàdi dîbà dyàkaya kabùlù kàà mashi aku mu mwaba wàkù musungùlùke bwà kutuutakeena ne diyì adi, pàkatuutakeenaku naadi, bufùki bwàkapeta diyì ditùma kùdì Nzambì bwà kumpàbu mubidi. Nènku ke mèmè kulediibwa mu cisà cyà bantu, Nakapèbwa mpungà bwà—bwà kushààla muntu wa meeji bu mùdì bukwà bantu emu, mu mùshindù wà ne mvwa mwà kwendesha màshinyì, anyì kwenza bintu mùtù bukwà bantu bwènzà, kwenda, kuyiikila, kwendesha màshinyì, ne bikwàbò byònsò. ngàakapèèbwa cyòcì aci bwalu ndi mulediibwe mu dîkù dyà bantu, ne mupèèbwe bukolè bwà meeji bwà kwikala muntu.

<sup>136</sup> Mpindyewu, pângààkalediibwà mu dîkù dyà Nzambì, mèmè kulwa ku Mashi, Mashi kumpèèshawù Mwoyi. Ne pashìishe paanyimà pàà mèmè mumanè kulwa ne mwoyi mu Kilistò, Yèyè kumbàtiiza ne Nyumà Mwîmpè ne bukolè, bwà kwikala mwànà wa Nzambì. Mpindyewu, ànu bu mùndi mwà kwenda, kuyiikila bu muntu, kwendesha kàshinyì kàànyì bu muntu, mpindyewu pàndi mpeta Nyumà Mwîmpè, ndi mpeta bukolè bwà kwipata nààbù baadémons, bwà kwakula ne myakulu mipyamipyà, kuyiisha Èvànjeeliyò, kwondopa babèèdi. Ndi mubàtìjiibwe! Ki mmulediibwe to; kàdi mubàtìjiibwe!

Bàvwa badisangishe mu cibambalu cyà kuulu,  
Bònsò bàsambila mu Dìna Dyèndè,  
Bàakabàtìjiibwa ne Nyumà Mwîmpè,  
Ki bukolè bwà mudimu kulwabù.

<sup>137</sup> Amen. Udi witabuuja bwà Mwoyi wà Cyendèlèlè, ne mulediibwe cyàkàbìdì ku diitabuuja dyèbè. Yesù wàkamba, mu Yone Munsantu 5.24 ne: “Ewu udi umvwa Mèyi Àànyì ne witabuuja Ewu udi muNtùme, ùdi ne mwoyi wà kashidi,” kí n'Nyumà Mwîmpè to, kàdi mwikàle ànu ne mwoyi wà kashidi. Ùdi mulediibwe mu dîkù dyà Nzambì. Ne pashìishe mubàtìjiibwe mu Nyumà Mwîmpè, ne bukolè bwà meeji à diitabuuja, bwà kwitabuuja Èvànjeeliyò bwà kuMutèèka mu mudimu ne kuMufikisha ku dyanza maalu mîmpè. Amen. Dîbà adi ùdi wènza maalu bu mwànà wa Nzambì. Dîbà adi ùdi mwà kwipata baadémons. Yesù wàkamba ne: “Bimanyinu ebi nebìfilè aba!” Nwamònu anyi? “Mu Dìna Dyànyì nebìipatè baadémons, nebàakule myakulu mipyamipyà, nebàkwatè nyoka ne byanza,

nebànwe bintu bìdì bishebeyangana.” Nwamònu’s, yéyè ùdi ùpeta bukolè ku Nyumà Mwímpè, bwà kwenza bintu ebi.

<sup>138</sup> Mpindyewu, pàakayàYe, Wákamba ne: “Mbímpè bwà Mémè kuya. Bwalu, Mémè ncíyi muyè to, Nyumà Mwímpè kàakulwa to.” Nwamònu anyi? Dìbà adi pàlwàYe, Neàtandishè bàà pa buloba bwà mpèkaatù, ne kulongesha bwakàne, ne kunuleeja bintu bìcilwalwà (abi mbikèènà-kumòna). “Yéyè neàngatè bintu bìNdi munùlongeshe, ne kunùsokolwelabi.” Méyi mene adiYe mulwè...Muntu nànsha umwe kèna mwà kuumvwa Dìyi pambèlù pàà dibàtiiza dyà Nyumà Mwímpè to. Ne pàdi muntu wàmba ne ùdi ne dibàtiiza dyà Nyumà Mwímpè, ne ùkokangana ne bulelèlà bwà Dìyi, kùdi cintu cidì kacíyi cyènda bímpe nànsha.

<sup>139</sup> Pòlò ùvwa mudyudi wa Dipungila Dipyadipyà. Kadivwa, Dipungila Dipyadipyà kadivwa difúnda to. Pòlò ùvwa mudyudi wa bwena Kilstò, Shawùlà. Kàdi pàpetèlèye Nyumà Mwímpe, wàkapweka bidimu bisàtù mu Asié e kulongayè Mifundù, bwalu ùvwa mulongeshiibwe kùdi Gàmaaliyèlè, mulongeshi munène. Pashiishe pàkalukilàye, ne bidimu dikumi ne binaayi paanyimà, wàkabàndà ku Yelusàlèmà bwà kutwilàngana ne Peetèlò, ne kusàngana ne bàvwa Dìyi ne ku Dìyi Èvànjeeliyò umwèumwè awu. Nzambì umwèumwè uvwa mwenzèje Peetèlò bwà kuyiisha mu ditùkù dyà Mpenta awu ne kubàmbila bwà kunyingalalabò ne kubàtijiibwabò mu Dìnà dyà Yesù Kilstò awu, Nyumà Mwímpe umwèumwè awu wàkacibuulwila Pòlò, ne yéyè wàkabàmbila mu Byenzedi 19 paanyimà pàà bamanè kubàtijiibwa musangu kampànda kùdi Yone, yéyè ne: “Bikèngela nùbatijiibwè cyàkàbìdì, mu Dìnà dyà Yesù Kilstò.” Nwamònu anyi?

<sup>140</sup> Nwamònu’s, Nyumà Mwímpè ùdi ùshààla ànu buludì ne Mifundù. Diitabuuja dyèndè mu Aci ki didì dikàngula bwalu-busokoka bwònsò. Amen. Bible mmwambè, mu Yone wa Kumpàla 5.7 ne: “Kùdi bàsàtù bàdi bàfila bujaadiki, mu Dyulu: Taatù, Dìyi (dìvwà Kilstò), ne Nyumà Mwímpè. Bàsàtù aba bàdi Umwe.” “Ne kùdi bàsàtù bàdi bàfila bujaadiki pa buloba: màyi, Mashi, Nyumà. Bàsàtù aba kabèèna umwe to, kàdi bàdi bùmvwangana mu umwe.” Mpindyewu, kwèna mwà kwikala ne Taatù kùyì ne Mwànà to, kwèna mwa kwikala ne Mwànà kùyì ne Nyumà Mwímpè to; Bàdi Umwe. Kàdi udi mwà kwikala mubingishiiibwe kùyì mujidiibwe to, ne udi mwà kwikala mujidiibwe kùyì ne Nyumà Mwímpè to. Dijidiibwa nku Mashi, ku Mashi ke kùdi Mwoyi ùlwila. Nwamònu anyi? Ne Nyumà Mwímpè ki bukolè bwà Nzambì, nwamònu’s, bukolè bwàkapèèshiibwa èkèleeziyà.

<sup>141</sup> “Nenùpetè” (cinyi?) “bukolè,” Byenzedi 1.8, “paanyimà pàà Nyumà Mwímpè mulwà pambidi pèènu. Nenùpetè bukolè!” (Kì ne “nenùlediibwè cyàkàbìdì to.”) “Nenùpetè bukolè paanyimà pàà Nyumà Mwímpè mumanè kulwa pambidi pèènu. Dìbà adi

nwênù nudi bantèmù Bàànyì mu Yelusàlèmà, mu Yudaàya, ne mu Sàmaalèyà, too ne ku bitùpà byà ndekeelu byà buloba.” Nwamònu anyì? Nudi nupeta bukolè paanyimà pàà nwênù bamane kupeta Nyumà Mwímpè. Kàdi dyàmbedi nudi ne cyà kupeta Nyumà Mwímpè, ne aci ki bukolè bwà Nzambi, nwamònu’s, bwà kumwènesha ne kuleeja patòòke. Nudi—nudi. . . bu munùvwà bantu, balonge bwà kwakula ne kwenda ne kwenza bintu mùtù muntu wènza; panùdi babàtìiibwe ne Nyumà Mwímpè, nudi bapèèbwè bukolè bwà kwenza maalu bu bàà bàà balùme ne bàà bakàjì bàà Nzambi. Kabyèna bikèmesha to mùdi bantu bènza maalu ne bènza mùshindù wùdìbo bènza leelù ewu, kacya kabàtukù banjì kuujìibwa tètè ne Nyumà Mwímpè to. Bu bóbò mwà kwikala buujìibwe, nùnkù’s bàvwa mwà kwenza bishìilàngàne. Bàdi bàmba mùdìbo buujìibwe, kàdi Yesù wàkamba ne: “Ku mamuma ààbò nkunwàbàmanyinà.” Pa nànkù mmunyi munùdi mwà kucyènza, nudi numòna’s, byònsò bìdi ànu bicyòmpàkaja. Nwamònu anyì? Kàdi alùkilaayi ku malelèla!

<sup>142</sup> Mpindyewu, wèwè mwikàle wenda mululame ne udyàmbe ne udi mwena Kilistò, tudi tukubiikila dilòlò edì ku mèèsà à Mukalenge. Leelù ewu, kakùyì mpatà nànsha mikesè to, mèèsà à Mukalenge mmangàciibwe mu ditùnga dijimà, àmwè à ku wòwò mu mùshindù kampànda ne makwàbò mu mukwàbò mùshindù. Kàdi ndi ngèèla meeji ne mùshindù mwímpè wà kucyènza nkulonda Mifundù, ànu mwàkacyènzàbo mu Mifundù amu. Ngèèla meeji ne aci ncifwànyine kwikala cikùmbàne.

<sup>143</sup> Mwanèètù Neville, udi ne Bible webè anyì? Mwanèètù Neville neàbalè mpindyewu Mifundù.

[Mwanèètù Neville ùdi wàmbe ne: “Mu nshapità wa 11 wa Kolintò wa Kumpàla, kubangila ku mvensà wa 23:”—Muf.]

*[Bwalu ndi mupete kùdi Mukalenge cìndi pàànyì munùtwàdile ne: Mukalenge Yesù mu bufùkù bùmwebùmwe bwàkamutungilàbo abu wàkangata dyàmpe:]*

*[Nènku pàkasàkidilàye, wàkadìcìbula, e kwambayè ne, Angàtaayi, nùdye; eci mmubidi wànyì, udi mucibùdìibwe bwà bwalu bwènù: nwikale nwenza nùnkù bwà kumvùluka.]*

*[Paanyimà mu mùshindù ùmwèùmwe awu kàbìdi wàkangata lupànza, pàkamanàbo kudya, wàmbe ne: Lupànza elu ncipungidi cipyacipyà mu mashi àànyì: enzàayi nùnkù, misangu yònsò yinùdi nulùnwa, bwà kumvùluka.]*

*[Bwalu misangu yònsò yinwàdyà dyàmpe edì, ne yinwànwà lupànza elu, nudi nuleeja lufù lwà Mukalenge too ne pààlwàye.]*



[*Ke bwà cinyi ewu yônsò wâdya dyâmpà edi, ne wânwa lupànza lwa Mukalenge elu, kâyi mubikùmbànyine to, neikalè mupùile kùdì mubidi ne mashi byà Mukalenge.*]

[*Kàdi muntu adikenkète yêyè mwinè, ne pa nânku àshùishe kudya dyâmpà adi, ne kunwà lupànza alu.*]

[*Bwalu ewu udi udyà ne unwà kâyi mukùmbànyine to, ùdi ùdya ne ùnwa dipùila dyèndè yêyè mwinè, pàdiye kâyi ùjingulula mubidi wà Mukalenge to.*]

[*Bwà bwalu ebu bàabûngi mbatekète ne biikale basaamasaama munkaci mwènù, ne bàabûngi mbalàale tulù mu lufù.*]

[*Bwalu bu twètù mwà kudilumbulwisha twètù biinè, katùvwa mwà kwikala ne cyà kulumbulwishibwa to.*]

[*Kàdi patùdi tulumbulwishibwa, tudi tunyookiibwa kùdì Mukalenge, bwà katùlù kupùishibwa pàmwè ne bàà pa buloba nânsha.*]

[“Mukalenge àbèneshè kubala kwà Dìyi Dyèndè.”]

<sup>144</sup> Bitu misangu yônsò ànu cintu cyà cijila, cintu cinsantu cyà mùshindù awu, ngèela meeji ne bìvwa bikèngela bwà twètù kwinyika mitù yètù mpindyewu mu disambila dyà cinyànyà. Nwânsambidilaayikù, nènñusambidilè. Tusambidilanganàayi muntu ne mukwèndè, bwà Nzambi wâtùfwilakù luse twètù bifùkiibwà bìdì kabìyi bikùmànyine bàdì bamba kwabanyangana mushingà ewu munène bwà kuvùluka lufù lwà Mukalenge.

<sup>145</sup> [Mwanèètù Branham ùdi wikisha bwà disambila dyà cinyànyà. Katùpà kàà mukàbà wà mèyi munda mutupù—Muf.] Disambila dyà ditonda edi ditùdi tuKulàmbula, Taatù wetù, pa cyoshelu Cyèbè cyà ngòlò, ne Mulàmbù wetù, Mukalenge Yesù. Tudi tulòmba nùnkù mu Dîna Dyèndè. Amen.

<sup>146</sup> Mpindyewu ndi ngiitabuuya ne bakùlù nebàngatè kaaba kààbò, ne bóbò nebùikalè. . . bàà èkèleeziyà, ne nebàtwale bantu piikalàbo bènda bàlwa, ku mulongo ku mulongo, bwà mèèsà à Mukalenge. Ntu misangu yônsò mvùluka musambu ewu:

Mwànà wa mùkòòkò Munanga udi upùnga ne lufù, Mashi Èbè à mushinga mukolè awu  
Kaadyàkujimija bukolè bwàwò nânsha,  
Too ne piikalà Èkèleeziyà mujimà wa Nzambi  
mupikùdiibwe ne cyà  
Kusungidiibwa, kàyikù mwà kwenza kàbìdì  
mpèkaatù to.

Twinyikaayi mitù yètù.

<sup>147</sup> Taatù wa ngàsà ne wa Cijila, Yèhowàh, wa Bukolè bwònsò munène awu, tùmakù mabènèsha Èbè pa cisàmbà Cyèbè

patùdì bindile apa. Tufwilaku luse ku mpèkaatù yètù. Nènku mpindyewu tudi tukulàmbula mushingà ewu, mvinyò ewu, tumuma twà mvinyò tùvwà tukolesha etu, ne byanza byà bambi mbitùvìnge pàmwè. Ne ntwènjiibwe mvinyò bwà kabingila katùdì tuKutwàdilaye mpindyewu aka, bwà wàmòna mwà kutùleeja Mashi à Mukalenge wetù Yesù Kilistò. Ndi nKulòmba, Taatù, bwà kujidila mvinyò bwà kiipacila aku. Tufwilèku luse ku mpèkaatù yètù yònsò. Swàkù bwà muntu yònsò wàngata mvinyò ewu mu mubidi wèndè, àpete bukolé bwà mubidi, dikàndà, ne lupàndù lwà kùdì Wèwè. Enzàku nàнку, Mukalenge. Tudi tulòmba nùнку mu Dìna dyà Yesù. Amen.

<sup>148</sup> Bible mwàmbe ne pàkacibùlàYe dyàmpa ne kudibènèsha, Wàkamba ne: “Angàtaayi nùdye, eci m’Mubidi Wànyì ùdì mucibula bwà bwalu bwènù. Ikàlaayi nwenza nùнку bwà kuMvùluka.” Nènku patùdì twangata tupese twà dyàmpa etu, dyà kosher, didì dyenza kadìyì dyela lwevènyì, ndyenza kùdì beena Kilistò, ndyenza bwalu didì—didì dileeja Mubidi wà Kilistò. Tudi tuumvwa ne—ne cìvwa mmu ditùkù dyà bayiidi bàà Kilistò, anyì ditùkù dyà èkèleeziyà, bààkangatà tutùpà ètu ne kulongolola didyà dyà dilòòlò ku didyà dyà dilòòlò dyà ndekeelu, ku didyà dyà Kilistò dyà ndekeelu dyà dilòòlò. Kàdi munda mwà Bible, bayiidi ke bàvwà bààbanyina bantu bintu ebi. Nènku leelù ewu, bayiidi bèètù bàà cyena-leelù aba, bàna bèètù bàà mu èkèleeziyà aba kaaba aka, bayiidi bàà Bwalu ebu, bàdi bààbanyina bantu aba. Nènku nebàngatè tutùpà etu e kutùpèsha bantu.


<sup>149</sup> Nènku mpindyewu panùdì nupeta dyàmpà edi, vùlukààyi ne, didì dileeja Mwànà wa mùkòòkò. Kùkaadi bidimu byàbùngì, pààkwoshiibwà mwànà wa mùkòòkò wà Izalèlè pa kapyà, ne pààkadìibwàwu ne bisoosà byà bululu, bantu bàvwa ne dikàndà; bisàbaata byàbò kabyàkasùnsuka nànsha, bilàmbà byàbò kabyàkasùnsuka nànsha, mu bule bwà lwendu lwònsò amu too ne mùfikilàbo mu buloba bwàbò bulaya. Nzambì àtùlamèku ne mubidi tumatuma, ne disànkà, biikale tumusadila too ne patwàfikà mu Buloba Bulaya bùdiYe mutùpe.

Tusambilààyi.

<sup>150</sup> Taatù wa mu Dyulu wa Ngàsà, pàndì ngàakula dilòòlò edi bwà Mubidi wà Cijila, mujidila wà Mukalenge wetù, mwena munda mùvwà musòmbèle kaabujimà kàà Bunzambì, pàndì ngeela meeji bwà Mubidi awu mwelà minyèngù ne—ne mucibùdìibwe, ne Mashi apàtuka, nyimà Wèndè ne mbadi Yèndè bìvwà bikenka, bwà mfibù yìvwàbo bamwelè paanyimà Pèndè pajimà, pàndì ngeèla meeji bwà dyàmpà dyèlè minyèngù, dituucìbwe ne didì dileeja cyòci aci, cidì citùvwila mu myoyi yètù, tudi tutèeka myoyi yètù panshì, Mukalenge, pa cyoshelu Cyèbè dilòòlò edi. Tufwilèku luse, Èyì Nzambì. Nènku swàkù bwà dyàmpà dicìbulula edi, pàdidi dyènda dibwela mukana mwà bantu aba, Basadidi Bèèbè, ne swàku bàfikeku ku dijingulula

ne ùvwa m'Mubidi Wèbè wà mushinga mukolè ùvwà muzajìibwe ne mutàpiibwe mpùtá, ne ku mibùndàbùndà twàkwondopiibwa. Enzàku nàнку, Mukalenge. Jidilà dyâmpà dyà kosher edi bwà kiipacila kààdi kasungùlùke aku. Tudi tulòmba mu Dìna dyà Yesù. Amen.

Indìlaayi katancì.

<sup>151</sup> Ki mmèèsà à Mukalenge à nkààyetù nànsha. Mwena kwitabuuja mwena Kìlistò yònsò mmwakidìibwe ku mèèsà à Mukalenge bwà kubwela neetù mu bwobùmwè...?... 

62-1007 Lusapì Bwà Ciibi  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)